

वीर सेवा मन्दिर
दिल्ली



क्रम संख्या

काल न०

खण्ड

भक्त-संग्रह दूसरा भाग

संग्रहकर्ता—
श्रीवियोगी हरिजी



पता—गीताप्रेस, गोरखपुर

मुद्रक तथा प्रकाशक
घनश्यामदास जालान
गीताप्रेस, गोरखपुर

मूल्य =) दो आना

- १ बार ५००० सं० १९८७ वि०
२ बार ५००० सं० १९८८ वि०
३ बार ५००० सं० १९९० वि०
४ बार ५००० सं० १९९१ वि०
५ बार ५००० सं० १९९४ वि०
६ बार ५००० सं० १९९७ वि०

श्रीहरिः

वक्तव्य

भजन-संग्रहके इस दूसरे भागको हमने दो विभागोंमें विभक्त कर दिया है। पहले विभागमें ब्रजके महात्माओंकी बानियाँ और दूसरेमें आत्मानुभवी प्रेमी सन्तोंके अनुभवके रंगमें रँगो कुछ शब्द संगृहीत किये गये हैं।

पहले विभागमें श्रीकृष्ण-प्रेमार्णवमें निमग्न महापुरुषोंके रसभरे भजन हैं। महात्मा सूरदासजीके पद पहले भागमें आ चुके हैं, क्योंकि तुलसी और कबीरसे हम उन्हें पृथक् नहीं कर सके। इस निकुञ्जमें अष्टछापके अन्य अनन्य भक्तों तथा हित-हरिवंश, स्वामी हरिदास, गदाधर भट्ट, हरिराम व्यास आदि ब्रज-रस-मधुकरोंकी सुललित गुञ्जार हम सुनते हैं। इन सब महात्माओंने नन्दनन्दन कृष्णचन्द्रकी मधुर लीलाओंका प्रत्यक्ष अनुभव किया था, इसमें सन्देह नहीं। अपने अनुभवोंको इन्होंने अनुपम पदोंसे अंकित किया है। पद और सुनकर हमारा मलिन हृदय कृष्ण-रसमें उन्मत्त होकर मयूरवत् नृत्य करने लगता है। ब्रज-बानीमें

वह सामर्थ्य है कि स्वयं ब्रजराजकुमारको हमारे हृदय-आँगनमें मानो किलक-किलककर बालकेल कराने लगती है। तब फिर किस अभागोका मन मचलकर ब्रजमण्डलके इन भक्त महात्माओंके पदोंकी ओर आकर्षित न होगा ?

दूसरे विभागमें नानक, दादूदयाल, रैदास, मल्लकदास आदि सन्तोंके पदोंका संक्षिप्त संग्रह है। सन्तशिरोमणि कबीर पहले भागमें आ चुके हैं। सूर और तुलसीका संग हम उन्हें कैसे छुड़ाते ? वास्तवमें ये शब्द सद्गुरुके प्रेम-बाण हैं। इनसे जो घायल हुआ, वह कृतकृत्य हो गया। वैराग्य और अनुरागकी झाँकी जैसी इन सन्त-बानियोंमें मिलती है, वैसी अन्यत्र दुर्लभ है।

क्या कभी ऐसा दिन आयगा, जब हम सब इन पुनीत पदोंके प्रेम-रसमें डूब जायँगे, लगनके इन शब्द-बाणोंसे घायल हो जायँगे ? भगवान् शीघ्र वह दिन लावें, यही हमारी कामना है।

मोहन-निवास,
पन्ना

}

त्रियोगी हरि

श्रीहरिः

अकारादि-क्रमसे विषय-सूची

[पहला खण्ड]

हितहरिवंश

भजन		पृष्ठ
तातैं मैया, मेरी सों, कृष्ण-गुन संचु	...	१८
प्रीति न काहु कि कानि बिचारै	...	२०
मोहन लालके रँग राची	...	१८
यह जु एक मन बहुत ठौर करि	...	१७
रहौ कोउ काहु मनहि दियें	...	१९

स्वामी हरिदास

काहूको बस नाहिं तुम्हारी कृपातैं	...	२१
गहौ मन सब रसको रस सार	...	२५
जौलों जीवै तौलों हरि भजु रे मन	...	२४
ज्योंही ज्योंही तुम राखत हौ	...	२१
तिनका बयारिके बस	...	२२
प्रेमसमुद्र रूपरस गहिरे, कैसे लगै घाट	...	२५
मन लगाइ प्रीति कीजै कर करवा सों	...	२३
हरिके नामको आलस क्यों	...	२३

भजन	पृष्ठ
हरिको ऐसोइ सत्र खेल	... २४
हित तौ कीजै कमलनैनसों	... २२

गदाधर भट्ट

आजु ब्रजराजको कुँवर बनते बन्यो	... ३४
कवै हरि, कृपा करिहौ सुरति मेरी	... ३०
जयति श्रीराधिके सकलमुखसाधिके	... ३१
जय महाराज ब्रजराज-कुल-तिलक	... ३२
झलत नागरि नागर लाल	... ३३
दिन दूलह मेरो कुँवर कन्हैया	... २७
नमो नमो जय श्रीगोविंद	... २८
श्रीगोविंद पद-पल्लव सिरपर विराजमान	... २७
सखी, हौँ स्याम रंग रँगी	... २६
सुंदर स्याम सुजानसिरोमनि	... ३५
हरि हरि हरि हरि रट रसना मम	... २९
है हरितें हरिनाम बड़ेरो	... ३०

नन्ददास

जो गिरि रुचै तौ बसौ श्रीगोवर्द्धन	... ४१
राम कृष्ण कहिये उठि भोर	... ४०

कुम्भनदास

जो पै चोंप मिलनकी होय	...	४४
नैन भरि देख्यौ नंदकुमार	...	४२
भगतकों कहा सीकरी काम	...	४२
हिलगिन कठिन है या मनकी	...	४३

परमानन्ददास

कौन रसिक है इन बातनकौ	...	४६
जसौदा तेरे भागकी कही न जाय	...	४७
जियकी साधन जिय ही रही री	...	४६
ब्रजके बिरही लोग बिचारे	...	४५
मेरौ माई माघोसों मन लाग्यौ	...	४८

कृष्णदास

जबतें स्याम सरन हौं पायौ	...	४९
बाल दसा गोपालकी सब काहू प्यारी	...	४९
मो मन गिरिधर छविपै अटक्यो	...	५०

व्यासजी

ऐसे ही बसिये ब्रजबीथिन	...	५५
कहा कहा नहिं सहत सरीर	...	५७
कहत सुनत बहुतै दिन बीते	...	६६
जैये कौनके अब द्वार	...	५६

(८)

भजन	पृष्ठ
जो दुख होत बिमुख घर आये	... ६१
जो सुख होत भगत घर आये	... ६४
धरम दुरथौ कलिराज दिखाई	... ५९
नव चक्र चूड़ा नृपति मन साँवरौ	... ५३
परम धन राधे नाम अधार	... ६७
भजौ सुत, साँचे स्याम पिताहि	... ५८
रसिक अनन्य हमारी जाति	... ५४
राधा-बल्लभ मेरौ प्यारौ	... ५१
बृंदावनकी सोभा देखे मेरे नैन सिरात	... ५२
साधन वैरागी जड़ बंग	... ६०
सुने न देखे भगत भिखारी	... ६३
हरिदासनके निकट न आवत	... ५४
हरि बिनु को अपनो संसार	... ६५

श्रीभट्ट

जुगुलकिसोर हमारे ठाकुर	... ७१
बलि-बलि श्रीराधे-नँदनँदना	... ७१
बसौ मेरे नैननिमें दोउ चंद	... ७२
ब्रजभूमि मोहिनी में जानी	... ६९
मदनगुपाल, सरन तेरी आयौ	... ६९

भजन	पृष्ठ
राधे, तेरे प्रेमकी कापै कहि आवै	... ७१
सेब्य हमारे हैं पिय प्यारे	... ७०
स्यामा-स्याम-पद पावै सोई	... ७०

सूरदास मदनमोहन

चलौ री, मुरली सुनिये, कान्ह	... ७७
नंदजू मेरे मन आनंद भयो, हौं	... ७३
प्रगट भई सोभा त्रिभुवनकी	... ७५
मधुके मतवारे स्याम, खोलो प्यारे पलकैं	... ७६
मेरे गति तुमहीं अनेक तोप पाऊँ	... ७५

नागरीदास

किते दिन बिन वृंदावन खोये	... ८३
चरचा करी कैसे जाय	... ७९
जो मेरै तन होते दोय	... ७९
दरपन देखत, देखत नाहीं	... ८०
दुहुँ भाँतिनकौ मैं फल पायौ	... ८१
ब्रजवासीतैं हरिकी सोभा	... ८४
ब्रज-सम और कोउ नहिं धाम	... ८५
भगति बिन हैं सब लोग निखट्टू	... ८२
हमारै मुरलीवारौ स्याम	... ७८

भजन	पृष्ठ
हरि जू अजुगत जुगत करेंगे	... ८१
हमारी सब ही बात सुधारी	... ८२

भगवतरसिक

इतने गुन जामें सो संत	... ९१
जय जय रसिक रवनी रवन	... ९२
नमो नमो बृंदावनचंद	... ९२
परसपर दोउ चकोर दोउ चंदा	... ८८
बेषधारी हरिके उर सालैं	... ८९
लखी जिन लालकी मुसक्यान	... ८८

नारायण स्वामी

करु मन, नंदनँदनको ध्यान	... ९६
चाहै तू योग करि भृकुटीमध्य ध्यान धरि	... १०१
जाहि लगन लगी घनस्यामकी	... ९३
टेर सुनों ब्रजराज-दुलारे	... १०७
देख सखी नव छैल छबीलौ	... १००
नयनों रे, चित-चोर बतावौ	... १०२
नंदनँदनके ऐसे नैन	... ९७
प्रीतम, तू मोहिं प्रानते प्यारौ	... ९५
बेदरदी, तोहि दरद न आवै	... ९९
मनमोहन जाकी दृष्टि परत	... ९५

भजन	पृष्ठ
मूरख, छाँड़ि बृथा अभिमान	... १०६
मोहन बसि गयो मेरे मनमें	... ९४
मोपै कैसी यह मोहिनी डारी	... १००
या साँवरेसों मैं प्रीति लगाई	... ९८
रूपरसिक, मोहन, मनोज-मन-हरन	... १०३
सखि, मेरे मनकी को जानै	... ९३
स्याम दृगनकी चोट बुरी री	... ९७

ललितकिशोरी

अब का सोवै सखि ! जाग जाग	... १०९
अब तौ तेरिय हाथ विकानी	... १२१
अब कुलकानि तजेही बनैगी	... १२३
कमलमुख खोलौ आजु पियारे	... १२३
दुनियाके परपंचोंमें हम मजा नहीं कछु पायाजी	११५
नैन चकोर, मुखचंदहृकों बारि डारौं	... १२०
मन, पछितैहो भजन बिनु कीने	... १०८
मुसाफिर, रेन रही थोरी	... १०८
मुरकि मुरकि चितवन चित चोरै	... ११८
मैं तुव पदतर रेनु रसीली	... १२२
मोहनके अति नैन नुकीले	... ११३
रे निरमोही, छबि दरसाय जा	... ११४

भजन	पृष्ठ
लटक लटक मनमोहन आबनि	... १०९
लजीले, सकुचीले, सरसीले, सुरमीले-से	... ११४
लाभ कहा कंचन तन पाये	... ११२
साधो, ऐसिइ आयु सिरानी	... १११

[दूसरा खण्ड]

दादूदयाल

अरे मेरा अमर उपावणहार रे	... १३२
अहो नर नीका है हरिनाम	... १३७
आव पियारे मीत हमारे	... १३१
इत है नीर नहावन जोग	... १३०
ऐसा राम हमारे आत्रै	... १२७
कबहूँ ऐसा बिरह उपावै रे	... १३५
कोइ जानै रे मरम माधइया केरौ	... १३४
क्यों बिसरै मेरा पीव पियारा	... १३४
जगसूँ कहा हमारा	... १३१
जागि रे सब रैण बिहाणी	... १३६
तब हम एक भये रे भाई	... १२९
तूँहीं मेरे रसना तूँही मेरे वैना	... १३९
तूँ साँचा साहिव मेरा	... १४४
तौलगि जिनि मारे तूँ मोहिं	... १२५

भजन	पृष्ठ
नूर रह्या भरपूर, अमीरस पीजिये	... १४१
पंडित राम मिलै सो कीजै	... १३८
बटाऊ रे चलना आज कि काल	... १३३
बाबा नहीं दूजा कोई	... १४०
बिरहणिकों सिंगार न भावै	... १२५
मन मूरिखा तैं यौहीं जनम गवायौ	... १४०
मेरे मन भैया राम कहौ रे	... १२४
मेरा मेरा छोड़ गँवारा	... १३०
राम रस मीठा रे, कोइ पीवै साधु सुजाण	... १२७
सोई सुहागनि साँच सिंगार	... १२८
सोई साध-सिरोमणी, गोबिंद गुण गावै	... १४२
संग न छाँड़ौं मेरा पावन पीव	... १२६
हिंदू तुरक न जाणौं दोइ	... १४३

रैदास

अब हम खूब वतन घर पाया	... १४८
अब कैसे छुटै नाम रट लागी	... १५५
आज दिवस लेऊँ बलिहारा	... १५३
ऐसो कछु अनुभौ कहत न आवै	... १४६
कवन भगति ते रहै प्यारो पाहुनो रे	... १५४

भजन	पृष्ठ
गाइ गाइ अब का कहि गाऊँ	... १४५
जब रामनाम कहि गावैगा	... १४७
जो तुम तोरौ राम मैं नाहिं तोरौं	... १५१
देहु कलाली एक पियाला	... १५०
पार गया चाहै सब कोई	... १५०
यह अंदेस सोच जिय मेरे	... १५१
रामा हो जग जीवन मोरा	... १४७
राम मैं पूजा कहा चढ़ाऊँ	... १४९
सो कहा जानै पीर पराई	... १५२

मलूकदास

अब तेरी सरन आयो राम	... १५७
ऐ अजीज ईमान तू, काहेको खोवै	... १६३
कौन मिलावै जोगिया हो	... १५८
गरब न कीजै बावरे, हरि गरब प्रहारी	... १६३
तेरा मैं दीदार-दिवाना	... १५९
दरद-दिवाने बावरे, अलमस्त फकीरा	... १६१
दीनबन्धु दीनानाथ मेरी तन हेरिये	... १६५
नाम हमारा खाक है, हम खाकी बन्दे	... १६२
ना वह रीझै जप-तप कीन्हे	... १६४

भजन	पृष्ठ
राम कहो राम कहो, राम कहो बावरे	... १६४
सदा सोहागिन नारि सो	... १५७
साँचा तू गोपाल, साँच तेरा नाम है	... १५८
हरि समान दाता कोउ नाहीं	... १५६
हमसे जनि लागै तू माया	... १६१

चरनदास

अब घर पाया हो मोहन प्यारा	... १७५
कोइ दिन जीवै तौ कर गुजरान	... १७५
गुरु हमरे प्रेम पियायौ हो	... १७४
जिन्हैं हरिभगति पियारी हो	... १७३
झलत कोइ कोइ संत लगन हिंडोलने	... १७२
टुक रंगमहलमें आव कि निरगुन सेज बिछी	... १६६
टुक निरगुन छैला सँ, कि नेह लगाव री	... १६७
तरसैं मेरे नैन हेली, राम-मिलन कब होयगो	१६७
प्रेमनगरके माहिं होरी होय रही	... १६९
मो बिरहिनकी बात हेली, बिरहिन होइ जानिहै	१६८
वह पुरुषोत्तम मेरा यार	... १७१
समझ रस कोइक पावै हो	... १७०
साधो निंदक मित्र हमारा	... १७३

भजन	पृष्ठ
सुन सुरत रँगीली हो कि हरि-सा यार करौ	१६६

गुरु नानक

अब मैं कौन उपाय करूँ	... १८१
काहे रे बन खोजन जाई	... १७९
जगतमें झूठी देखी प्रीत	... १८४
जो नर दुखमें दुख नहिं मानै	... १८२
प्रभु मेरे प्रीतम प्रान पियारे	... १८०
मुरसिद मेरा भरहमी, जिन मरम बताया	... १७८
यह मन नेक न कह्यौ करै	... १८३
या जग भीत न देख्यो कोई	... १८१
राम सुमिर, राम सुमिर, एही तेरो काज है	... १७७
सब कछु जीवतकौ ब्यौहार	... १७७
हौं कुरबाने जाउँ पियारे	... १७८

दरिया साहब

कहा कहुँ मेरे पिउकी बात	... १८७
जाके उर उपजी नहिं भाई	... १८५
जो धुनियाँ तौ भी मैं राम तुम्हारा	... १८६
बाबल कैसे बिसरो जाई	... १८७
रामनाम नहिं हिरदे धरा	... १८८





भगवान् और उनकी ह्लादिनी शक्ति श्रीराधाजी

ॐ श्रीपरमात्मने नमः

भजन-संग्रह

दूसरा भाग (पहला खण्ड)



हितहरिवंश

(१) गौरी

यह जु एक मन बहुत ठौर करि
कहि कौने सचु पायो ।
जहँ तहँ बिपति जारि जुवती ज्यों
प्रगट पिंगल गायो ॥
द्वै तुरंग पर जोर चढ़त हठि
परत कौन पै धायो ।
कहि धौँ कौन अंक पर राखै
ज्यों गनिका सुत जायो ॥
हितहरिवंस प्रपंच वंच सब
काल ब्यालको खायो ।

यह जिय जानि स्याम-स्यामा पद-

कमल संगि सिर नायो ॥

(२) पद

तार्ते भैया, मेरी सौँ, कृष्ण-गुन संचु ।

कुत्सित बाद विकारहिं परधन

सुनु सिख परतिय बंचु ।

मनि गुन पुंज जु ब्रजपति छौंइत

हितहरिवंस सुकर गहि कंचु ॥ १ ॥

पायो जानि जगतमें सब जन

कपटी कुटिल कलिजुगी टंचु ।

इहि परलोक सकल सुख पावत,

मेरी सौँ, कृष्ण-गुन संचु ॥ २ ॥

(३) बिलावल

मोहन लालके रँग राची ।

मेरे ख्याल परौ जिन कोऊ,

बात दसोदिसि माची ॥

कंत अनंत करौ किनि कोऊ,
 नाहिं धारना साँची ।
 यह जिय जाहु भले सिर ऊपर,
 हौं तु प्रगट हें नाची ॥
 जाग्रत सयन रहत ऊपर मनि,
 ज्यों कंचन संग पाँची ।
 हितहरिवंस डरौ काके डर,
 हौं नाहिन मति काँची ॥

(४) भैरवी

रहौ कोउ काहू मनहि दियें ।
 मेरे प्राननाथ श्रीस्यामा,
 सपथ करों तिन छियें ॥
 जे अवतार कदंब भजत हैं,
 धरि दृढ़ व्रत जु हियें ।
 तेऊ उमगि तजत मरजादा,
 बन बिहार रस पियें ॥

खोये रतन फिरत जे घर घर,
 कौन काज इमि जियें ।
 हितहरिवंस अनतु सचु नाहीं,
 बिन या रसहिं लियें ॥

(५) बिहाग

प्रीति न काहु कि कानि बिचारै ।
 मारग अपमारग विथकित मन,
 को अनुसरत निवारै ॥
 ज्यों पावस सरिता जल उमगत,
 सनमुख सिंधु सिधारै ।
 ज्यों नादहिं मन दिये कुरंगनि,
 प्रगट पारधी मारै ॥
 हितहरिवंसहिं लग सारँग ज्यों
 सलभ सगीरहिं जारै ।
 नाइक निपुन नवल मोहन ब्रिनु
 कौन अपनपौ हारै ॥

स्वामी हरिदास

(६) विभास

ज्योंहीं ज्योंहीं तुम राखत हो,
 त्योंहीं त्योंहीं रहियतु हैं हो हरि ।
 और अचरचै पाइ धरौं,
 सु तौ कहों कौनके पैड भरि ॥
 जदपि हौं अपना भायो कियो चाहौं,
 कैसे करि सकौं जो तुम राखौ पकरि ।
 कहि हरिदास पिंजराके जनावरलौं,
 तरफराइ रह्यो उड़िवेको कितोउ करि ॥

(७)

काहूको बस नाहिं तुम्हारी कृपा तें,
 सब होय विहारी विहारिनि ।
 और मिथ्या प्रपंच काहेको भाषियै,
 सो तो है हारनि ॥ १ ॥

जाहि तुमसों हित ताहि तुम हित करौ,
सब सुख कारनि ।

श्रीहरिदासके स्वामी स्यामा कुंजबिहारी,
प्राणनिके आधारनि ॥ २ ॥

(८) आसावरी

हित तौ कीजै कमलनैनसों,
जा हित आगे और हित लागौ फीको ।
कै हित कीजै साधुसँगतिसों,
जावै कलमष जी को ॥ १ ॥

हरिको हित ऐसो जैसो रंग मजीठ,
संसार हित कसूभि दिन दुतीको ।
कहि हरिदास हित कीजै बिहारीसों,
और न निब्राहु जानि जी को ॥ २ ॥

(९)

तिनका बयारिके बस ।
ज्यों भावै त्यों उड़ाइ लै जाइ आपने रस ॥

ब्रह्मलोक सिवलोक, और लोक अस ।
कह हरिदास विचारि देख्यो बिना बिहारी नाही जस

(१०)

हरिके नामको आलस क्यों,
करत है रे काल फिरत सर साँधैं ।
हीरा बहुत जवाहर संचे,
कहा भयो हस्ती दर बाँधैं ॥
बेर कुबेर कछु नहिं जानत,
चढ़ो फिरत है काँधैं ।
कहि हरिदास कछु न चलत जब,
आवत अंतकी आँधैं ॥

(११)

मन लगाइ प्रीति कीजै कर करवा सों,
ब्रजबीथिन दीजै सोहिनी ।
बृंदावन सों बन उपवन सों,
गुंज माल कर पोहिनी ॥

गो गोसुतन सों, मृग मृगसुतन सों,
 और तन नेक न जोहिनी ।
 श्रीहरिदासके स्वामी स्यामा कुंजबिहारी सों,
 चित ज्यों सिर पर दोहिनी ॥

(१२) कल्याण

हरिको ऐसोइ सब खेल ।
 मृग-तृन्ना जग व्याप रही हैं,
 कहुँ बिजोरो न बेल ॥
 धनमद जोवनमद औ राजमद,
 ज्यों पंछिनमें डेल ॥
 कह हरिदास यहै जिय जानौ,
 तीरथको सो मेल ॥

(१३)

जौ लौं जीवै तौ लौं हरि भजु रे मन,
 और बात सब बादि ।
 दिवस चारिको हला भला तू,
 कहा लेइगो लादि ॥ १ ॥

स्वामी हरिदास

मायामद गुनमद जोवनमद,
भूल्यौ नगर बिबादि ।
कहि हरिदास लोभ चरपट भयो,
काहेकी लागै फिरादि ॥ २ ॥

(१४)

प्रेमसमुद्र रूपरस गहिरे, कैसे लागै घाट ।
वेकारयो दै जानि कहावत,
जानि पनोकी कहा परी बाट ॥
काहूको सर परै न सूधो,
मारत गाल गली गली हाट ।
कहि हरिदास बिहारिहिं जानौ,
तकौ न औघट घाट ॥

(१५) बिहाग

गहौ मन सब रसको रस सार ।
लोक बेद कुल करमै तजिये, भजिये नित्य बिहार ॥
गृह कामिनि कंचन धन त्यागौ, सुमिरौ स्याम उदार ।
कहि हरिदास रीति संतनकी, गादीको अधिकार ॥



गदाधर भट्ट

(१६)

सखी, हौं स्याम रंग रँगी ।
 देखि बिकाइ गयी वह मूरति,
 सूरति माहिं पगी ॥ १ ॥

संग हुतो अपनो सपनो सो,
 सोइ रही रस खोई ।
 जागेहु आगे दृष्टि परै सखि,
 नेकु न न्यारो होई ॥ २ ॥

एक जु मेरी अँखियनिमें निसि-
 धोस रह्यो करि भौन ।
 गाइ चरावन जात सुन्यो सखि,
 सो धौं कन्हैया कौन ॥ ३ ॥

कासों कहौं कौन पतियावै,
 कौन करै बकवाद ।

कैसे कौ कहि जात गदाधर,
गूँगेको गुड़ खाद ॥ ४ ॥

(१७) विभास

दिन दूल्ह मेरो कुँवर कन्हैया ।
नितप्रति सखा सिंगार सँवारत,
नित आरती उतारति मैया ॥ १ ॥
नितप्रति गीत बाद्य मंगल धुनि,
नित सुर मुनिवर विरद कहैया ।
सिरपर श्रीब्रजराज राजवित,
तैसेई ढिग बलनिधि बल मैया ॥ २ ॥
नितप्रति रासबिलास व्याहनिधि,
नित सुर-तिय सुमननि बरसैया ।
नित नव नव आनंद बारिनिधि,
नित ही गदाधर लेत बलैया ॥ ३ ॥

(१८) ध्रुपद

श्रीगोविंद पद-पल्लव सिर पर बिराजमान,
कैसे कहि आवै या सुखको परिमान ।

ब्रजनरेस देस बसत कालानल हू ब्रसत ,
 बिलसत मन हुलसत करि लीलामृत पान ॥ १ ॥
 भीजे नित नयन रहत प्रभुके गुनग्राम कहत ,
 मानत नहिं त्रिविध ताप जानत नहिं आन ।
 तिनके मुखकमल दरस पावन पद-रेनु परस ,
 अधम जन गदाधरसे पावै सनमान ॥ २ ॥

(१९) श्री

नमो नमो जय श्रीगोविंद ।
 आनँदमय ब्रज सरस सरोवर,
 प्रगटित विमल नील अरविंद ॥ १ ॥
 जसुमति नीर नहे नित पोषित,
 नव-नव ललित लाड़ सुखकंद ।
 ब्रजपति तरनि प्रताप प्रफुल्लित,
 प्रसरित सुजस सुवास अमंद ॥ २ ॥
 सहचरि जाल मराल संग रँग,
 रसभरि नित खेलत सानंद ।

अलि गोपीजन नैन गदाधर,
सादर पिवत रूपमकरंद ॥ ३ ॥

(२०) सारंग

हरि हरि हरि हरि रट रसना मम ।
पीवति खाति रहति निधरक भई,
होत कहा तोकों स्रम ॥ १ ॥
तैं तो सुनी कथा नहिं मोसे,
उधरे अमित महाधम ।
ग्यान ध्यान जप तप तीरथ व्रत,
जोग जाग बिनु संजम ॥ २ ॥
हेमहरन द्विजद्रोह मान-मद,
अरु पर गुरु दारागम ।
नामप्रताप प्रबल पावकके,
होत जात सलभासम ॥ ३ ॥
इहि कलिकाल कराल ब्याल विष-
ज्वाल विषम भोये हम ।

बिनु इहि मंत्र गदाधरके क्यों,
मिटिहै मोह महातम ॥ ४ ॥

(२१) आसावरी

है हरितें हरिनाम बड़ेरो ।
ताकों मूढ़ करत कत ज्ञेरो ॥ १ ॥

प्रगट दरस मुचकुंदहिं दीन्हों,
ताहू आयुसु भो तप केरो ॥ २ ॥

सुतहित नाम अजामिल लीनों,
या भवमें न कियो फिरि फेरो ॥ ३ ॥

पर-अपवाद स्वाद जिय राच्यौ,
बृथा करत बकवाद घनेरो ॥ ४ ॥

कौन दसा हूँहै जु गदाधर,
हरि हरि कहत जात कहा तेरो ॥ ५ ॥

(२२) सारंग

कबै हरि, कृपा करिहौ सुरति मेरी ।
और न कोऊ काटनकों मोह बेरी ॥ १ ॥

काम लोभ आदि ये निरदय अहेरी ।
 मिलिकै मन मति मृगी चहूँधा घेरी ॥२॥
 रोपी आइ पास पासि दुरासा केरी ।
 देत वाहीमें फिरि फिरि फेरी ॥३॥
 परी कुपथ कंटक आपदा घनेरी ।
 नैक ही न पावति भजि भजन सेरी ॥४॥
 दंभके आरंभ ही सतसंगति डेरी ।
 करै क्यों गदाधर विनु करुना तेरी ॥५॥

(२३) दंडक

जयति श्रीराधिके सकलसुखसाधिके
 तरुनिमनि नित्य नवतन-किसोरी ।
 कृष्णतनु लीन मन रूपकी चातकी
 कृष्णमुख हिमकिरिनकी चकोरी ॥१॥
 कृष्णदृग भृंग त्रिस्रामहित पद्मिनी
 कृष्णदृग मृगज चंधन सुडोरी ।

कृष्ण-अनुराग मकरंदकी मधुकरी
 कृष्ण-गुन-गान रस-सिंधु बोरी ॥२॥
 त्रिमुख परचित्त ते चित्त जाको सदा
 करत निज नाहकी चित्त चोरी ।
 प्रकृति यह गदाधर कहत कैसे बनै,
 अमित महिमा इतै बुद्धि थोरी ॥३॥

(२४) दंडक

जय महाराज ब्रजराज-कुल-तिलक
 गोविंद गोपीजनानंद राधारमन ।
 नंद-नृप-गेहिनी गर्भ आकर रतन
 सिष्ट-कष्टद धृष्ट दुष्ट दानव दमन ॥१॥
 बल-दलन-गर्व-पर्वत-बिदारन
 ब्रज-भक्त-रच्छा-दच्छ गिरिराजधर धीर ।
 त्रिविध बेल कुसल मुसलधर संग लै
 चारु चरणांक चित तरनि-तनया-तीर ॥२॥

कोटि कंदर्प दर्पापहर लावन्य धन्य

वृंदारन्य भूषण मधुर तरु ।

मुरलिकानाद पियूषनि महानंदन

बिदित सकल ब्रह्म रुद्रादि सुरकरु ॥३॥

गदाधरबिषै वृष्टि करुना-दृष्टि करु

दीनको त्रिबिध संताप ताप तवन ।

मैं सुनी तुव कृपा कृपन-जन-गामिनी

बहुरि पैहै कहा मो बराबर कवन ॥४॥

(२५) हिंडोल

झूलत नागरि नागर लाल ।

मंद मंद सब सखी झुलावति,

गावति गीत रसाल ॥१॥

फरहराति पट पीत नीलके,

अंचल चंचल चाल ।

मनहुँ परसपर उमैंगि ध्यान छबि,

प्रगट भई तिहि काल ॥२॥

सिलसिलात अति प्रिया सीस तें,

लटकति बेनी नाल ।

जनु पिय मुकुट बरहि भ्रमबस तहँ,

ब्याली विकल बिहाल ॥३॥

मल्ली माल प्रियाकी उरझी,

पिय तुलसी दल माल ।

जनु सुरसरि रबितनया मिलिकै,

सोभित खेनि मराल ॥४॥

स्यामल गौर परसपर प्रति छवि,

सोभा विसद बिसाल ।

निरखि गदाधर रसिक-कुँवरि मन,

परयो सुरस जंजाल ॥५॥

(२६) गौरी

आजु ब्रजराजको कुँवर बनते बन्यो,

देखि आवत मधुर अधर रंजित बेनु ।

मधुर कलगान निज नाम सुनि सवन-पुट,
 परम प्रमुदित बदन फेरि हूँकति धेनु ॥१॥
 मदबिघूर्णित नैन मंद बिहँसनि बैन,
 कुटिल अलकावली ललित गोपदरेनु ।
 ग्वाल-बालनि जाल करत कोलाहलनि,
 संग दलताल धुनि रचत संचत चैनु ॥२॥
 मुकुटकी लटक अरु चटक पटपीतकी,
 प्रगट अंकुरित गोपी मनहिं मैनु ।
 कहि गदाधर जु इहि न्याय ब्रजसुंदरी
 बिमल बनमालके बीच चाहतु ऐनु ॥३॥

(२७) गारी

सुंदर स्याम सुजानसिरोमनि,
 देउँ कहा कहि गारी हो ।
 बड़े लोगके औगुन बरनत,
 सकुचि उठत मन भारी हो ॥१॥

को करि सकै पिताको निरनौ
 जाति-पाँति को जानै हो ।
 जाके मन जैसीयै आवत
 तैसिय भाँति बखानै हो ॥२॥
 माया कुटिल नटी तन चितवत
 कौन बड़ाई पाई हो ।
 इहि चंचल सब जगत बिगोयो
 जहँ तहँ भई हँसाई हो ॥३॥
 तुम पुनि प्रगट होइ बारे तें
 कौन भलाई कीनी हो ।
 मुकति-बधू उत्तम जन लायक
 लै अधमनिकों दीनी हो ॥४॥
 बसि दस मास गरभ माताके
 इहि आसा करि जाये हो ।
 सो घर छाँड़ि जीभके लालच
 भये हो पूत पराये हो ॥५॥

बारेतें गोकुल गोपिनके
 सूने घर तुम डाटे हो ।
 पैटे तहाँ निसंक रंक लौं
 दधिके भाजन चाटे हो ॥६॥
 आपु कहाइ धनीको दोटा
 भात कृपन लौं माँग्यो हो ।
 मान भंग पर दूजै जाचतु
 नैकु सँकोच न लाग्यो हो ॥७॥
 लोलुप तातें गोपिनके तुम
 सूने भवन ढँढोरे हो ।
 जमुना न्हात गोप-कन्यनिके
 निलज निपट पट चोरे हो ॥८॥
 बैनु बजाइ बिलास करत बन
 बोलि पराई नारी हो ।
 ते बातें मुनिराज सभामें
 है निसंक बिस्तारी हो ॥९॥

सब कोउ कहत नंदबाबाको
 घर भरयो रतन अमोलै हो ।
 गर गुंजा सिर मोर-पखौवा
 गायनके सँग डोलै हो ॥१०॥
 साधु-सभामें बैठनिहारो
 कौन तियन सँग नाचै हो ।
 अग्रज संग राज-मारगमें
 कुब्रजहिं देखत लाचै हो ॥११॥
 अपनि सहोदरि आपुहि छल करि
 अरजुन संग नसाई हो ।
 भोजन करि दासी-सुतके घर
 जादव-जाति लजाई हो ॥१२॥
 लै लै भजे नृपतिकी कन्या
 यह धौं कौन बड़ाई हो ।
 सतभामा गोतमें विवाही
 उलटी चाल चलाई हो ॥१३॥

बहिन पिताकी सास कहाई
 नैकहु लाज न आई हो ।
 ऐसेइ भाँति बिधाता दीन्हौं
 सकल लोक ठकुराई हो ॥१४॥
 मोहन बसीकरन चट चेटक
 मंत्र जंत्र सब जानै हो ।
 तात भले जु भले सब तुमको
 भले भले करि मानै हो ॥१५॥
 बरनौं कहा जथा मति मेरी
 बेदहु पार न पावै हो ।
 भट्ट गदाधर प्रभुकी महिमा
 गावत ही उर आवै हो ॥१६॥



नन्ददास

(२८)

राम-कृष्ण कहिये उठि भोर ।

अवध-ईस वे धनुष धरे हैं,

यह ब्रज-माखन-चोर ॥१॥

उनके छत्र चँवर सिंहासन,

भरत सत्रुहन लछमन जोर ।

इनके लकुट मुकुट पीताम्बर,

नित गायन-सँग नन्द-किसोर ॥२॥

उन सागरमें सिला तराई

इन राख्यौ गिरि नखकी कोर ।

‘नन्ददास’ प्रभु सब तजि भजिये,

जैसे निरखत चंद चकोर ॥३॥

(२९)

जो गिरि रुचै तौ बसौ श्रीगोवर्धन,
 गाम रुचै तौ बसौ नँदगाम ।
 नगर रुचै तौ बसौ श्रीमधुपुरी,
 सोभासागर अति अभिराम ॥ १ ॥
 सरिता रुचै तौ बसौ श्रीजमुनातट,
 सकल मनोरथ पूरन काम ।
 नन्ददास कानन रुचै तौ,
 बसौ भूमि बृंदावन-धाम ॥ २ ॥



कुम्भनदास

(३०) सारंग

भगतकौं कहा सीकरी काम ।
 आवत . जात पन्हैया टूटी
 बिसरि गयो हरिनाम ॥ १ ॥
 जाको मुख देखे दुख लागै
 ताको करन परी परनाम ।
 कुम्भनदास लाल गिरधर बिन
 यह सब झूठौ धाम ॥ २ ॥

(३१) धनाश्रो

नैन भरि देख्यौ नंदकुमार ।
 ता दिनतेँ सब भूलि गयौ हौं
 बिसरयो पन परवार ॥ १ ॥
 बिन देखे हौं बिकल भयौ हौं
 अंग अंग सब हारि ।

ताते सुधि है साँवरि मूरतिकी
लोचन भरि भरि बारि ॥ २ ॥

रूप-रास पैमित नहीं मानों
कैसें मिलै लो कन्हाइ ।

कुम्भनदास प्रभु गोबरधन-धर
मिलिये बहुरि री माइ ॥ ३ ॥

(३२) धनाश्री

हिलगिन कठिन है या मनकी ।

जाके लियै देखि मेरी सजनी
लाज गई सब तनकी ॥ १ ॥

धरम जाउ अरु लोग हँसौ सब
अरु गात्रौ कुल गारी ।

सो क्यों रहै ताहि बिनु देखे
जा जाकौ हितकारी ॥ २ ॥

रसलुबधक निमिख न छाँड़त है
ज्यों अधीन मृग गानों ।

कुंभनदास सनेह परम श्री—

गोब्रधन-धर जानों ॥ ३ ॥

(३३) सारंग

जो पै चोंप मिलनकी होय ।

तौ क्यों रहै ताहि बिनु देखै

लाख करौ जिन कोय ॥ १ ॥

जो यह बिरह परसपर व्यापै

जो कछु जीवन बनै ।

लोकलाज कुलकी मरजादा

एकौ चित्त न गनै ॥ २ ॥

कुंभनदास प्रभु जाय तन लागी

और न कछु सुहाय ।

गिरधरलाल तोहि बिनु देखै

छिन छिन कल्प बिहाय ॥ ३ ॥



परमानन्ददास

(३४) बिहागरौ

ब्रजके बिरही लोग बिचारे ।

बिन गोपाल ठगसे ठाढ़े

अति दुरबल तन हारे ॥ १ ॥

मात जसोदा पंथ निहारत

निरखत साँझ सकारे ।

जो कोइ कान्ह कान्ह कहि बोलत

अँखियन बहत पनारे ॥ २ ॥

यह मथुरा काजरकी रेखा

जे निकसे ते कारे ।

परमानंद स्वामि बिनु ऐसे

ज्यों चंदा बिनु तारे ॥ ३ ॥

(३५) कान्हरा

कौन रसिक है इन बातनकौ ।

नंद-नँदन बिन कासों कहिये

सुन री सखी मेरौ दुख या मनकौ ॥ १ ॥

कहाँ वह जमुनापुलिन मनोहर

कहाँ वह चंद सरद रातिनकौ ।

कहाँ वह मंद सुगंध अमल रस

कहाँ वह षटपद जलजातनकौ ॥ २ ॥

कहाँ वह सेज पौढ़िबौ बनकौ

फूल बिछौना मृदु पातनकौ ।

कहाँ वह दरस परस परमानंद

कोमल तन कोमल गातनकौ ॥ ३ ॥

(३६) सारंग

जियकी साधन जिय ही रही री ।

बहुरि गोपाल देखि नहीं पाए

बिलपत कुंज अहीरी ॥ १ ॥

एक दिन सोंज समीप यहि मारग
 बेचन जात दही री ।
 प्रीतके लएँ दानमिस मोहन
 मेरी बाँह गही री ॥ २ ॥
 बिन देखे घड़ि जात कल्प सम
 बिरहा अनल दही री ।
 परमानंद स्वामि बिन दरसन
 नैन न नाँद बही री ॥ ३ ॥

(३७) विलावल

जसौदा तेरे भागकी कही न जाय ।
 जो मूरति ब्रह्मादिक दुरलभ
 सो प्रगटे हैं आय ॥ १ ॥
 सिब नारद सनकादि महामुनि
 मिलिबे करत उपाय ।
 ते नँदलाल धूरि-धूसर-बपु
 रहत गोद लिपटाय ॥ २ ॥

रतन जड़ित पौढ़ाय पालनै
 बदन देखि मुसुकाइ ।
 झूलौ मेरे लाल बलिहारी
 परमानंद जस गाइ ॥ ३ ॥

(३८) पूरबी

मेरौ माई माधोसौं मन लाग्यौ ।
 मेरौ नैन अरु कमलनैनको
 इकठौरौं करि मान्यौ ॥ १ ॥
 लोक बेदकी कानि तजी मैं
 न्यौती अपने आन्यौ ।
 इक गोबिंद चरनके कारन
 बैर सबनसों ठान्यौ ॥ २ ॥
 अब को भिन्न होय मेरी सजनी !
 दूध मिल्यौ जैसे पान्यौ ।
 परमानंद मिली गिरधरसों
 है पहली पहचान्यौ ॥ ३ ॥



कृष्णदास

(३९) देवगंधार

जबते स्याम सरन हौं पायौ ।
 तबते भैंट भई श्रीबल्लभ,
 निज पति नाम बतायौ ॥ १ ॥
 और अविद्या छौंड़ि मलिन मति,
 सुतिपथ आय दृढ़ायौ ।
 कृष्णदास जन चहुँ जुग खोजत,
 अब निहचै मन आयौ ॥ २ ॥

(४०) बिलावल

बाल दसा गोपालकी सब काहू प्यारी ।
 लै लै गोद खिलावहीं, जसुमति महतारी ॥ १ ॥
 पीत झँगुलि तन सोहहीं सिर कुलहि बिराजै ।
 छुद्रघंटिका कटि बनी, पाय नूपुर बाजै ॥ २ ॥

मुरि मुरि नाचै मोर ज्यों सुरनर मुनि मोहै ।
 कृष्णदास प्रभु नंदके आँगनमें सोहै ॥ ३ ॥

(४१) गौरी

मो मन गिरिधरछविपै अटक्यौ ।
 ललित त्रिभंग चालपै चलिकै,
 चिबुक चारु गड़ि ठटक्यौ ॥ १ ॥
 सजल स्याम घन बरन लीन है,
 फिर चित अनत न भटक्यौ ।
 कृष्णदास किये प्रान निछावर,
 यह तन जग सिर पटक्यौ ॥ २ ॥



व्यासजी

(४२) सारंग

राधा-वल्लभ मेरौ प्यारौ ।
 सरबोपरि सबहीकौ ठाकुर,
 सब सुखदानि हमारौ ॥ १ ॥

ब्रज बृंदावन नाइक सेवा-
 लाइक स्याम उज्यारौ ।
 प्रीत रीत पहचानै जानै
 रसिकनकौ रखवारौ ॥ २ ॥

स्याम कमल-दल-लोचन मोचन,
 दुख नैननकौ तारौ ।
 अवतारी सब अवतारनकौ
 महतारी महतारौ ॥ ३ ॥

मूरतिवंत काम गोपिनको
 गाय गोपको गारौ ।

व्यासदासकौँ प्राण सजीवन
छिनभर हृदय न टारौ ॥ ४ ॥

(४३) सारंग

बृंदावनकी सोभा देखे मेरे नैन सिरात ।
कुंज निकुंज पुंज सुख बरसत
हरषत सबकौँ गात ॥ १ ॥

राधा मोहनके निज मंदिर
महाप्रलय नहिं जात ।
ब्रह्मातेँ उपज्यौ न अखंडित
कबहूँ नाहिं नसात ॥ २ ॥

फनिपर रवि तरि नहिं बिराट महँ
नहिं संध्या नहिं प्रात ।
माया कालरहित नित नूतन
सदा फूल फल पात ॥ ३ ॥

निरगुन सगुन ब्रह्मातेँ न्यारौ
बिहरत सदा सुहात ।

व्यास विलास रास अदभुत गति,
निगम अगोचर बात ॥ ४ ॥

(४४) चर्चरी

नव चक्र चूड़ा नृपति मन साँवरौ,
राधिका तरुनिमनि पट्टरानी ।
सेस ग्रह आदि वैकुण्ठ परिजंत सब
लोक थानैत ब्रज राजधानी ॥ १ ॥

मेघ छ्यानवै कोटि बाग सींचत जहाँ,
मुक्ति चारौ तहाँ भरति पानी ।
सूर ससि पाहरू पवन जन इंदिरा,
चरनदासी भाट निगम बानी ॥ २ ॥

धर्म कुतवाल सुक सूत नारद चारु,
फिरत चर चारि सनकादि ग्यानी ।
सत्तगुन पौरिया काल वैंधुवा जहाँ,
कर्म बस काम रति सुख निसानी ॥ ३ ॥

कनक मरकत धरनि कुंज कुसुमिति महल,
 मध्य कमनीय सयनीय ठानी ।
 पल न बिछुरत दुऊ जात नहिं तहँ कोऊ,
 व्यास महलनि लिये पीकदानी ॥ ४ ॥

(४५) धनाश्री

हरिदासनके निकट न आवत प्रेत पितर जमदूत ।
 जोगी भोगी संन्यासी अरु पंडित मुंडित धूत ॥
 ग्रह गन्नेस सुरेस सिवा सिव डर करि भागत भूत ।
 सिधि निधि बिधिनिषेध हरिनामहिं डरपत रहत कुपूत
 सुख-दुख पाप-पुन्य मायामय ईति-भीति आकूत ।
 सबकी आसत्रास तजि व्यासहि भावत भगत सपूत ॥

(४६) सारंग

रसिक अनन्य हमारी जानि ।
 कुलदेवी राधा, बरसानौ खेरौ,
 ब्रजबासिन सौं पाँति ॥ १ ॥

गौत गोपाल, जनेऊ माला,
 सिखा सिखंडि, हरि-मंदिर भाल ।
 हरिगुन नाम बेद धुनि सुनियत,
 मूँज पखावज, कुस करताल ॥ २ ॥
 साखा जमुना, हरि-लीला षटकरम
 प्रसाद प्राण धन रास ।
 सेवा बिधि-निषेध जड़ संगति,
 बृत्ति सदा बृंदावन बास ॥ ३ ॥
 समृति भागवत, कृष्ण नाम संध्या,
 तरपन गायत्री जाप ।
 बंसी रिषि जजमान कलपतरु
 व्यास न देत असीस सराप ॥ ४ ॥

(४७)

ऐसे ही बसिये ब्रजबीथिन ।
 साधुनके पनवारे चुनि चुनि,
 उदर पोषियत सीथिन ॥ १ ॥

घूरनमेके बीनि चिनगटा
 रच्छा कीजै सीतन ।
 कुंज कुंज प्रति लोटि लगे उडि
 रज ब्रजकी अंगीतन ॥ २ ॥
 नितप्रति दरस स्याम-स्यामाको
 नित जमुना जल पीतन ।
 ऐसेहि व्यास रुचै तन पावन
 ऐसेहि मिलत अतीतन ॥ ३ ॥

(४८)

जैये कौनके अब द्वार ।

जो जिय होय प्रीति काहूके दुख सहिये सौ बार ॥
 घर-घर राजस तामस बाढ़यौ, धन-जोबनकौ गार ।
 काम-बिबस ह्वै दान देत नीचनकों होत उदार ॥
 साधु न सूझत बात न बूझत ये कलिके व्यौहार ।
 व्यासदास कत भाजि उबरियै परियै मौंझीधार ॥

(४९)

कहा कहा नहिं सहत सरीर ।
 स्याम-सरन बिनु करम सहाइन,
 जनम-मरनकी पीर ॥ १ ॥
 करुनावंत साधु-संगति बिनु,
 मनहिं देय को धीर ।
 भगति भागवत बिनु को मेटै,
 सुख दै दुखकी भीर ॥ २ ॥
 बिनु अपराध चहूँ दिसि बरषत
 पिसुन बचन अति तीर ।
 कृष्ण-कृपा कवचीते उबरै
 पावै तबही सीर ॥ ३ ॥
 चेतहु भैया, बेगि बढी कलि-
 काल नदी गंभीर ।
 व्यास बचन बलि बृंदावन बसि,
 सेवहु कुंज कुटीर ॥ ४ ॥

(५०)

भजौ सुत, साँचे स्याम पिताहि ।
 जाके सरन जात ही मिटिहै
 दारुन दुखकी दाहि ॥ १ ॥
 कृपावंत भगवंत सुने मैं
 छिनि छाँड़ौ जिनि ताहि ।
 तेरे सकल मनोरथ पूजैं
 जो मथुरा लौं जाहि ॥ २ ॥
 वै गोपाल दयाल दीन तू,
 करिहैं कृपा निबाहि ।
 और न ठौर अनाथ दुखिनको
 मैं देख्यौ जग माँहि ॥ ३ ॥
 करुना बरुनालयकी महिमा
 मोपै कही न जाहि ।
 व्यासदासके प्रभुको सेवत
 हारि भई कहुँकाहि ? ॥ ४ ॥

(५१) सारंग

धरम दुरयौ कलिराज दिखाई ॥
 कीनों प्रगट प्रताप आपनौ
 सब विपरीति चलाई ।
 धन भौ मीत, धरम भौ बैरी
 पतितनसों हितवाई ॥ १ ॥
 जोगी जती तपी संन्यासी
 ब्रत छाँड़्यौ अकुलाई ।
 बरनास्रमकी कौन चलावै
 संतनहूमें आई ॥ २ ॥
 देखत संत भयानक लागत
 भावते ससुर जमाई ।
 संपति सुकृत सनेह मान चित
 ग्रह-व्यौहार बड़ाई ॥ ३ ॥
 कियो कुमंत्री लोभ आपुनों
 महामोह जु सहाई ।

काम क्रोध मद मोह मत्सरा
 दीन्हीं देस दुहाई ॥ ४ ॥
 दान लैनकौ बड़े पातकी
 मचलनकौ बँभनाई ।
 लरन मरनकौ बड़े तामसी
 वारौ कोटि कसाई ॥ ५ ॥
 उपदेसनकौ गुरू गुसाई
 आचरनै अधमाई ।
 व्यासदासके सुकृत साँकरे-
 में गोपाल सहाई ॥ ६ ॥

(५२)

साधन बैरागी जड़ बंग ।
 धातु रसायन औषध सेवत
 निसिदिन बढ़त अनंग ॥ १ ॥
 सुक-बचननकौ रंग न लाग्यौ
 भयौ न संसै भंग ।

विष विकार गुन उपजै ब्रित लगि
 सबै करत चित भंग ॥ २ ॥
 बनमें रहत गहत कामिनि कुच
 सेवत पीन उतंग ।
 धनि धनि साधु ! दंभकी मूरति,
 दियो छाँड़ि हरि-संग ॥ ३ ॥
 लोभ बचन बाननि अँग-अंगनि
 सोभित निकर निषंग ।
 व्यास आस जम पासि गरे,
 तिहि भावै राग न रंग ॥ ४ ॥

(५३)

जो दुख होत विमुख घर आये ।
 ज्यौं कारौ लागे कारी निसि,
 कोटिक बीछू खाये ॥ १ ॥
 दुपहर जेठ जरत बारूमें
 घायन लौन लगाये ।

काँटन माँझ फिरैं बिनु पनहीं,
मूड़ैं टोला खाये ॥ २ ॥

ज्यों बाँझहिं दुख होत सौतिकौ
सुंदर बेटा जाये ।

देखत ही मुख होत जितौ दुख
बिसरत नहिं बिसराये ॥ ३ ॥

भटकत फिरत निलज बरजत ही
कूकर ज्यों झहराये ।

गारी देत बिलग नहिं मानत
फूलत दमरी पाये ॥ ४ ॥

अति दुख दुष्ट जगतमें जेते
नैक न मेरे भाये ।

भूळि दरस नहिं कीजौ वाकौ,
व्यास बचन बिसराये ॥ ५ ॥

(५४)

सुने न देखे भगत भिखारी ।
 तिनके दाम-कामकौ लोभ न
 जिनके कुंजबिहारी ॥ १ ॥
 सुक नारद अरु सिव सनकादिक,
 जे अनुरागी भारी ।
 तिनको मत भागवत न समुझै
 सबकी बुधि पचि हारी ॥ २ ॥
 रसना इंद्री दोऊ बैरिन
 जिनकी अनी अन्यारी ।
 करि आहार बिहार परसपर
 बैर करत बिभचारी ॥ ३ ॥
 बिषइनिकी परतीति न हरिसों
 प्रीति रीति बाजारी ।
 व्यास आस-सागरमें बूडैं
 आई भगति बिसारी ॥ ४ ॥

(५५)

जो सुख होत भगत घर आये ।
 सो सुख होत नहीं बहु संपति,
 बाँझहिं बेटा जाये ॥ १ ॥
 जो सुख होत भगत चरनोदक
 पीवत गात लगाये ।
 सो सुख सपनेहू नहिं पैयत
 कोटिक तीरथ न्हाये ॥ २ ॥
 जो सुख भगतनकौ मुख देखत
 उपजत दुख बिसराये ।
 सो सुख होत न कामिहिं कबहूँ
 कामिनि उर लपटाये ॥ ३ ॥
 जो सुख कबहूँ न पैयत पितु घर
 सुतकौ पूत खिलाये ।
 सो सुख होत भगत बचननि सुनि
 नैननि नीर बहाये ॥ ४ ॥

जो सुख होत मिलत साधुनसों
छिन छिन रंग बढ़ाये ।
सो सुख होत न नेक व्यासकौं
लंक सुमेरु पाये ॥ ५ ॥

(५६)

हरि त्रिनु को अपनौ संसार ।
माया मोह बँध्यो जग बूड़त,
काल नदीकी धार ॥ १ ॥
जैसे संघट होत नावमें
रहत न पैले पार ।
सुत संपति दारा सों ऐसे
बिछुरत लौ न बार ॥ २ ॥
जैसे सपने रंक पाय निधि
जानै कछु न सार ।
ऐसे छिनभंगुर देहीके
गरबहि करत गँवार ॥ ३ ॥

जैसे अँधरे टेकत डोलत
 गनत न खाइ पनार ।
 ऐसे ब्यास बहुत उपदेसे
 सुनि-सुनि गये न पार ॥ ४ ॥

(५७)

कहत सुनत बहुतै दिन बीते
 भगति न मनमें आई ।
 स्यामकृपा त्रिनु, साधुसंग त्रिनु
 कहि कौने रति पाई ॥ १ ॥
 अपने अपने मत-मद भूले
 करत आपनी भाई ।
 कहाँ हमारौ बहुत करत हैं,
 बहुतनमें प्रभुताई ॥ २ ॥
 मैं समझी सब काहु न समझी,
 मैं सबहिन समझाई ।

भोरे भगत हुते सब तबके,
हमरे बहु चतुराई ॥ ३ ॥

हमहीं अति परिपक्व भये
औरनिकै सबै कचाई ।

कहनि सुहेली रहनि दुहेली
वातनि बहुत बड़ाई ॥ ४ ॥

हरिमंदिर माला धरि, गुरु करि
जीवनके सुखदाई ।

दया दीनता दासभाव विनु
मिलैं न व्यास कन्हाई ॥ ५ ॥

(५८) कान्हरा

परमधन राघे नाम अधार ।

जाहि स्याम मुरलीमें टेरत,
सुमिरत बारंबार ॥ १ ॥

जंत्र-मंत्र औ बेद तंत्रमें,

सबै तारकौ तार ।

श्रीसुक प्रगट कियो नहिं यातैं

जानि सारकौ सार ॥ २ ॥

कोटिन रूप धरे नँद-नंदन,

तऊ न पायौ पार ।

व्यासदास अब प्रगट बखानत,

डारि भारमें भार ॥ ३ ॥



श्रीभट्ट

(५९) पद

मदनगुपाल, सरन तेरी आयौ ।
 चरनकमलकी सरन दीजिये,
 चेरौ करि राखौ घर जायौ ॥ १ ॥

धनि-धनि मात-पिता सुत-बंधू,
 धनि जननी जिन गोद ग्विळायौ ।
 धनि-धनि चरन चलत तीरथकौ,
 धनि गुरुजन हरिनाम सुनायौ ॥ २ ॥

जे नर विमुख भये गोविंदसों,
 जनम अनेक महादुख पायौ ।
 श्रीभट्टके प्रभु दियौ अभय पद,
 जम डरप्यौ जब दास कहायौ ॥ ३ ॥

(६०)

ब्रजभूमि मोहिनी मैं जानी ।
 मोहन कुंज मोहन बृंदावन मोहन जमुनापानी ॥ १ ॥

मोहन नारि सकल गोकुलकी बोलति अमरतबानी ।
श्रीभटके प्रभु मोहन नागर मोहनि राधारानी ॥२॥

(६१)

सेव्य हमारे हैं पिय प्यारे बृंदा-त्रिपिन-बिलासी ।
नँद-नंदन बृषभानु-नंदिनी चरन अनन्य उपासी १
मत्त प्रनयवस सदा एकरस त्रिविध निकुंजनिवासी ।
श्रीभट जुगुलरूप वंसीवट सेवन सब सुखरासी ।२।

(६२)

स्यामा स्याम पद पावैं सोई ।
मन-बच-क्रम करि सदा नित्य जेहि
हरि-गुरु पदपंकज रति होई ॥ १ ॥
नंदसुवन बृषभानुसुता पद
भजै तजै मन आनै जोई ।
श्रीभट अटकि रहे स्वामीपन
आन ब्रतै मानै सब छोई ॥ २ ॥

(६३)

जुगुलकिसोर हमारे ठाकुर ।
 सदा सरबदा हम जिनके हैं,
 जनम-जनम धरजाये चाकर ॥१॥
 चूक परै परिहरै न कबहूँ,
 सबही भाँति दयाके आकर ।
 जै श्रीभट्ट प्रगट त्रिभुवनमें,
 प्रनतनि पोपत परम सुधाकर ॥ २ ॥

(६४)

बलि-बलि श्रीराधे-नँदनँदना ।
 मेरे मनकी अमित अघटना को जानै तुम बिना ॥
 भलेई चारु चरन दरसाये हूँढ़त फिरिहौ बृंदाबना ।
 जै श्रीभट्ट स्यामा स्यामरूप पै निवछावर तन-मना ॥


(६५)

राधे, तेरे प्रेमकी कापै कहि आवै ।
 तेरीसी गोपकी तोपै बनि आवै ॥

मन-बच-क्रम दुरगम सदा तापै चरन छुवावै ।
जै श्रीभट मति बृषभानु तेज प्रताप जनावै ॥

(६६)

बसौ मेरे नैननिमें दोउ चंद ।
गौरबदनि बृषभानुनंदिनी,
स्यामवरन नँदनंद ॥ १ ॥
गोकुल रहे लुभाय रूपमें,
निरखत आनँदकंद ।
जै श्रीभट प्रेमरस-बंधन,
क्यों छूटै दृढ़ फंद ॥ २ ॥



सूरदास मदनमोहन

(६७) वधाई

नंदजू मेरे मन आनंद भयो, हौं
 गोवरवन तें आयौ ।
 तुम्हरे पुत्र भयो, हौं सुनिकै
 अति आतुर उठि धायौ ॥ १ ॥
 बंदीजन अरु भिच्छुक सुनि सुनि
 देस देस तें आये ।
 इक पहले ही आसा लागे
 बहुत दिनन तें छाये ॥ २ ॥
 ते पहिरैं कंचन मनि मुकता
 नाना बसन अनूप ।
 मोहि मिले मारगमें मानों
 जात कहुँके भूप ॥ ३ ॥

तुम तौ परम उदार नंदजू
 जोइ माँग्या सोइ दीनों ।
 ऐसौ और कौन त्रिभुवनमें
 तुम सरि साकौ कीनों ॥ ४ ॥
 लच्छ हेतु तौ परधौ रहौं हौं
 त्रिनु देखे नहिं जैहौं ।
 नंदराइ सुनि त्रिनती मेरी
 तत्रै विदा भलि हैहौं ॥ ५ ॥
 दीजै मोहिं कृपा करि साईं
 जो हौं आयौ माँगन ।
 जसुमति-सुत अपने पाइनि चलि
 खेलत आवै आँगन ॥ ६ ॥
 जब तुम मदनमोहन कहि टेरौ
 यह सुनि हौं घर जाउँ ।
 हौं तौ तेरो घरकौ दाढ़ी
 सूरदास मो नाउँ ॥ ७ ॥

(६८)

प्रगट भई सोभा त्रिभुवनकी भानु गोपके आइ ।
 अद्भुत रूप देखि ब्रजवनिता रीझीं लेत बलाइ ॥
 नहिं कमला, नहिं सची, नहीं रति उपमाहू न समाइ ।
 जा हित प्रगट भए ब्रजभूषन धन्य पिता धन माइ ॥
 जुग जुग राज करो दोऊ जन इत तुव उत नँदराइ ।
 उनके मदनमोहन तेरे स्यामा सूरदास बलि जाइ ॥

(६९) देस

मेरे गति तुमहीं अनेक तोष पाऊँ ।
 चरन-कमल-नख-मनिपर बिषै-सुख बहाऊँ ।
 घर घर जो डोलीं तौ हरि तुम्हैं लजाऊँ ॥१॥
 तुम्हरौ कहाइ कहौ कौनकौ कहाऊँ ।
 तुमसे प्रभु छौंड़ि कहा दीननकौं धाऊँ ॥२॥
 सीस तुम्हैं नाय कहौ कौनकौ नवाऊँ ।
 कंचन उर हार छौंड़ि काच क्यो बनाऊँ ॥३॥

सोभा सब हानि करूँ जगतकौँ हँसाऊँ ।
 हाथीतें उतरि कहा गदहा चढ़ि धाऊँ ॥४॥
 कुमकुमकौ लेप छाँड़ि काजर मुँह लाऊँ ।
 कामधेनु घरमें तज अजा क्यों दुहाऊँ ॥५॥
 कनकमहल छाँड़ि क्योंऽव परनकुटी छाऊँ ।
 पाइन जो पेलौ प्रभु तौ न अनत जाऊँ ॥६॥
 सूरदास मदनमोहन जनम जनम गाऊँ ।
 संतनकी पनहीकौ रच्छक कहाऊँ ॥७॥

(७०) बिलावल

मधुके मतवारे स्याम, ग्वालौ प्यारे पलकैं ।
 सीस मुकुट लटा छुटी और छुटी अलकैं ॥१॥
 सुर-नर-मुनि द्वार ठाढ़े दरसहेतु किलकैं ।
 नासिकाके मोनि सोहैं बीच लाल ललकैं ॥२॥
 कटि पीतांबर मुरली कर स्रवन कुँडल झलकैं ।
 सूरदास मदनमोहन दरस देहौ भलकैं ॥३॥

(७१) देस

चलौ री, मुरली सुनिये, कान्ह बजाई जमुनातीर ।
 तजि लोकलाज कुलकी कानि गुरुजनकी भीर ॥
 जमुनाजल थकित भयो बछा न पावैं छीर ।
 सुरबिमान थकित भये थकित कोकिल-कीर ॥
 देहकी सुधि बिसरि गई बिसरौ तनकौ चीर ।
 मात-तात बिसर गये बिसरे बालक-बीर ॥
 मुरली-धुनि मधुर बाजै कैसेकै धरौ धीर ।
 सूरदास मदनमोहन जानत हौ परपीर ॥



नागरीदास

(७२)

हमारै मुरलीवारौ स्याम ।

बिनु मुरली बनमाल चन्द्रिका,
नहिं पहिचानत नाम ॥१॥

गोपरूप बृंदावन-चारी,
ब्रज-जन पूरन काम ।

याहीसों हित चित्त बढ़ौ नित,
दिन-दिन पल छिन जाम ॥२॥

नंदीसुर गोवरधन गोकुल,
बरसानों बिस्राम ।

नागरिदास द्वारका मथुरा,
इनसों कैसो काम ॥३॥

(७३)

चरचा करी कैसे जाय ।

बात जानत कछुक हमसों, कहत जिय थहराय ॥
 कथा अकथ सनेहकी, उर नाहिं आवत और ।
 बेद समृती उपनिषदकों, रही नाहिंन ठौर ॥
 मनहिमें है कहनि ताकी, सुनत सोता नैन ।
 सोऽत्र नागर लोग बूझत, कहि न आवत बैन ॥

(७४)

जो मेरै तन होते दोय ।

मैं काहूतें कछु नहिं कहतौ,
 मोतें कछु कहतौ नहिं कोय ॥१॥
 एक जु तन हरि-बिमुखनके
 सँग रहतो देस-बिदेस ।
 विविध भाँतिके जग-दुख-सुख जहँ
 नहीं भगति-लवलेस ॥२॥

एक जु तन सतसंग रंग रँगि,
 रहतौ अति सुख पूर ।
 जनम सफल कर लेतौ ब्रज बसि,
 जहँ ब्रज जीवनमूर ॥३॥
 द्वै तन बिन द्वै काज न हैहै,
 आयु सु छिन-छिन छीजै ।
 नागरिदास एक तनते अब,
 कहौ कहा करि लीजै ॥४॥

(७५)

दरपन देखत, देखत नाही ।
 बालापन फिरि प्रगट स्याम कच,
 बहुरि स्वेत है जाहीं ॥१॥
 तीन रूप या मुखके पलटे,
 नहिं अयानता छूटी ।
 नियरे आवत मृत्यु न सूझत,
 आँखें हियकी फूटी ॥२॥

कृष्ण-भगति-सुख लेत न अजहूँ,
 बृद्ध देह दुखरासी ।
 नागरिया सोई नर निहचै,
 जीवत नरकनिवासी ॥ ३ ॥

(७६)

हरि जू अजुगत जुगत करेंगे ।
 परबत ऊपर बहल काँचकी, नीके लै निकरेंगे ॥
 गहिरे जल पाषान नाव बिच, आछी भाँति तरेंगे ।
 मैँन तुरंग चढ़े पावक बिच, नाहीं पिघरि परेंगे ॥
 याहू ते असमंजस हो किन, प्रभु दृढ़ कर पकरेंगे ।
 नागर सब आधीन कृपाके, हम इन डर न डरेंगे ॥

(७७)

दुहूँ भाँतिनकौ मैँ फल पायौ ।
 पाप किये ताते बिमुखन सँग, देस-देस भटकायौ ॥
 तुच्छ कामना हित कुसंग बसि, झूठे लोभ लुभायौ ।
 कौन पुन्य अब बृंदावन, बरसाने सुबस बसायौ ॥

आनंदनिधि ब्रज अनन्य-मंडली, उर लगाय अपनायौ
 सुनि बेहूकों दुरलभ सो सब, रस-बिलास दरसायौ ॥
 स्यामा-स्याम दास नागरकौ, कियौ मनोरथ भायौ ॥

(७८)

हमारी सब ही बात सुधारी ।
 कृपा करी श्रीकुंजविहारिनि, अरु श्रीकुंजविहारी ॥
 राख्यौ अपने वृंदावनमें, जिहि ठाँ रूप उजारी ।
 नित्य केलि आनंद अखंडित, रसिक संग सुखकारी ॥
 कलह कलेस न व्यापै इहि ठाँ, ठौर बिस्व तेँ न्यारी ।
 नागरिदासहिं जन्म जितायो, बलिहारी बलिहारी ॥

(७९)

भगति बिन हैं सब लोग निखट्टू ।
 आपसमें लड़िबे भिड़िबेकों, जैसे जंगी टट्टू ॥
 नित उनकी मति भ्रमत रहत है, जैसे लोलुप लट्टू ॥
 नागरिया जगमें वे उछरत, जिहि बिधि नटके बट्टू ॥

(८०)

किते दिन बिन बृंदावन खोये ।
 योंही बृथा गये ते अब लौं,
 राजस रंग समोये ॥ १ ॥
 छाँड़ि पुलिन फूलनिकी मैया,
 सूल सरनि सिर सोये ।
 भीजे रसिक अनन्य न दरसे,
 विमुखनिके मुख जोये ॥ २ ॥
 हरि बिहारकी ठौरि रहे नहिं,
 अति अभाग्य बल बोये ।
 कलह सराय वसाय भठ्यारी,
 माया राँड़ विगोये ॥ ३ ॥
 इक रस ह्याँके सुख तजिकै ह्याँ,
 कब्रौं हँसे कबौं रोये ।
 क्रियौ न अपनो काज, पराये
 भार सीसपर ढोये ॥ ४ ॥

पायौ नहिं आनंद लेस मैं,
 सबै देस टकटोये ।
 नागरिदास बसै कुंजनमें,
 जत्र सब त्रिवि सुख भोये ॥ ५ ॥

(८१)

ब्रजवासीतें हरिकी सोभा ।
 वैन अधर छवि भये त्रिभंगी,
 सो वा ब्रजकी गोभा ॥ १ ॥
 ब्रज बन धातु विचित्र मनोहर,
 गुंज-पुंज अति सोहैं ।
 ब्रजमोरनिको पंख सीसपर,
 ब्रज-जुवती मन मोहैं ॥ २ ॥
 ब्रज-रज नीकी लगति अलकपै,
 ब्रज द्रुम फल अरु माल ।
 ब्रज गउवनके पाछे आछे,
 आवत मद गज चाल ॥ ३ ॥

बीच लाल ब्रजचंद सुहाये,
 चहूँ ओर ब्रज गोप ।
 नागरिया परमेसुरहूकी
 ब्रज तें बाढ़ी ओप ॥ ४ ॥

(८२)

ब्रज-सम और कोउ नहिं धाम ।
 या ब्रजमें परमेसुरहूके
 सुधरे सुंदर नाम ॥ १ ॥
 कृष्ण नाँव यह सुन्यो गर्गतिं,
 कान्ह कान्ह कहि बोलैं ।
 बालकेलि-रस मगन भये सब,
 आनँद-सिंधु कलोलैं ॥ २ ॥
 जसुदानंदन, दामोदर, नव-
 नीत-प्रिय, दधिचोर ।
 चीरचोर, चितचोर, चिकनियाँ,
 चातुर, नवलकिसोर ॥ ३ ॥

ब्रजलोचन, ब्रजरमन, मनोहर,
 ब्रजउत्सव, ब्रजनाथ ।
 ब्रजजीवन, ब्रजबल्लभ सबके,
 ब्रजकिसोर, सुभगाथ ॥ ८ ॥
 ब्रजमोहन, ब्रजभूषण, सोहन,
 ब्रजनायक ब्रजचंद्र ।
 ब्रजनागर, ब्रजलैल, छत्रीले,
 ब्रजवर, श्रीनंदनंद ॥ ९ ॥
 ब्रज आनंद, ब्रजदूल्ह नितहीं,
 अति सुंदर ब्रजलाल ।
 ब्रज गउवनके पाछे आछे,
 सोहत ब्रजगोपाल ॥ १० ॥
 ब्रज-संबंधी नाम लेत ये,
 ब्रजकी लीला गावै ।
 नागरिदासहि मुरलीवारो,
 ब्रजको ठाकुर भावै ॥ ११ ॥



भगवतरसिक

(८३) पद

लखी जिन लालकी मुसक्यान ।

तिनहिं बिसरी बेदबिधि, जप,

जोग, संयम, ध्यान ॥ १ ॥

नेम, व्रत, आचार, पूजा,

पाठ, गीता, ज्ञान ।

रसिक भगवत दृग दई असि,

ऐचिकै मुख म्यान ॥ २ ॥

(८४)

परसपर दोउ चकोर दोउ चंदा ।

दोउ चातक, दोउ खाती, दोउ घन,

दोउ दामिनी अमंदा ॥ १ ॥

दोउ अरबिंद, दोऊ अलि लंपट,

दोउ लोहा, दोउ चुंबक ।

दोउ आशिक, महबूब दोउ मिलि,
 जुरे जुराफा अंबक ॥ २ ॥
 दोउ मेघ, दोउ मोर, दोउ मृग,
 दोउ राग-रस-भीने ।
 दोउ मनि बिसद, दोउ बर पन्नग,
 दोउ बारि, दोउ मीने ॥ ३ ॥
 भगवतरसिक बिहारिनि प्यारी,
 रसिक बिहारी प्यारे ।
 दोउ मुख देखि जियत अधरामृत
 पियत होत नहिं न्यारे ॥ ४ ॥

(८५) सारंग

बेषधारी हरिके उर सालैं ।
 लोभी, दंभी, कपटी नट-से,
 सिस्त्रोदरकों पालैं ॥ १ ॥
 गुरू भये घर घरमें डोलैं,
 नाम धनीको बेंचैं ।

परमारथ सपने नहिं जानैं,
पैसनहीकों खैंचैं ॥ २ ॥

कबहुँक बकता है बनि बैठे,
कथा भागवत गावैं ।

अरथ अनरथ कछु नहिं भाषैं,
पैसनहीकों धावैं ॥ ३ ॥

कबहुँक हरिमंदिरकों सेवैं,
करैं निरंतर बासा ।

भाव भगतिकौ लेस न जानैं,
पैसनहीकी आसा ॥ ४ ॥

नाचैं, गावैं, चित्र बनावैं,
करैं काव्य चटकीली ।

साँच बिना हरि हाथ न आवैं,
सब रहनी है ढीली ॥ ५ ॥

बिनु बिबेक-बैराग, भगति बिनु,
सत्य न एकौ मानौ ।

भगवतबिमुख कपट चतुराई,
सो पाखंडै जानौ ॥ ६ ॥

(८६)

इतने गुन जामें सो संत ।

श्रीभागवत मध्य जस गावत,

श्रीमुख कमलाकंत ॥ १ ॥

हरिकौ भजन साधुकी सेवा,

सर्वभूत पर दाया ।

हिंसा, लोभ, दंभ, छल त्यागै,

बिषसम देगै माया ॥ २ ॥

सहनसील, आसय उदार अति,

धीरजसहित, बिबेकी ।

सत्यव्रचन सबकों सुखदायक,

गहि अनन्य व्रत एकी ॥ ३ ॥

इंद्रीजित, अभिमान न जाके,

करै जगतकों पावन ।

भगवतरसिक तासुकी संगति

तीनहुँ ताप नसावन ॥ ४ ॥

(८७) गौरी

नमो नमो बृंदावनचंद ।

नित्य, अनंत, अनादि, एकरस,

पिय प्यारी बिहरत स्वच्छंद ॥ १ ॥

सत्त-चित्त-आनंदरूपमय

खग-मृग, द्रुम-बेन्नी बर बृंद ।

भगवतरसिक निरंतर सेवत,

मधुप भये पीवत मकरंद ॥ २ ॥

(८८) ईमन

जय जय रसिक खनीरवन ।

रूप, गुन, लावन्य, प्रभुता, प्रेम पूरन भवन ॥

बिपति जनकी भानबेकों, तुम बिना कहु कवन ।

हरहु मनकी मलिनता, व्यापै न माया पवन ॥

बिषय रस इंद्री अजीरन, अति करावहु पवन ।

खोलिये हियके नयन, दरसै सुखद बन अवन ॥

चतुर, चिंतामनि, दयानिधि, दुसह दारिद दवन ।

मेटिये भगवत व्यथा, हँसि भेंटिये तजि मवन ॥



नारायण स्वामी

(८९) आसावरी

सखि, मेरे मनकी को जानै ।
कासों कहीं सुनै जो चित दै,
हितकी बात वखानै ॥ १ ॥
ऐसो को है अंतरजामी,
तुरत पीर पहिचानै ।
नारायन जो बीत रही है,
कब कोई सच मानै ॥ २ ॥

(९०) सोरठ

जाहि लगन लगी घनस्यामकी ।
धरत कहूँ पग, परत हैं कितहूँ,
भूल जाय सुधि धामकी ॥ १ ॥
छवि निहार नहिं रहत सार कछु,
घरि पल निसिदिन जामकी ।

जित मुँह उठै तितै ही धावै,
 सुरति न छाया घामकी ॥ २ ॥
 अस्तुति निंदा करौ भलै ही,
 मेड़ तजी कुल-गामकी ।
 नारायन बौरी भइ डोलै,
 रही न काहू कामकी ॥ ३ ॥

(९१)

मोहन बसि गयो मेरे मनमें ।
 लोक-लाज कुल-कानि छूटि गई,
 याकी नेह-लगनमें ॥ १ ॥
 जित देग्वों तितही वह दीखै,
 घर-बाहर, आँगनमें ।
 अंग-अंग प्रति रोम-रोममें,
 छाइ रह्यो तन-मनमें ॥ २ ॥
 कुंडल-झलक कपोलन सोहै,
 बाजूबंद भुजनमें ।
 कंकन कलित ललित बनमाला,
 नूपुर-धुनि चरननमें ॥ ३ ॥

चपल नैन, भ्रुकुटी बर बाँकी,
 ठाढ़ौ सघन लतनमें ।
 नारायन बिन मोल विक्री हौं,
 याकी नैक हसनमें ॥ ४ ॥

(९२)

मनमोहन जाकी दृष्टि परत,
 ताकी गति होत है और और ।
 नसुहात भवन, तन असन बसन,
 बनहीकों धावत दौर दौर ॥ १ ॥
 नहिं धरत धीर, हिय वरत पीर,
 व्याकुल है भटकत ठौर ठौर ।
 कब अँसुवन भर नारायन मन,
 झँकत डोलत पौर पौर ॥ २ ॥

(९३) खमाच

प्रीतम, तू मोहिं प्रानते प्यारौ ।
 जो तोहि देखि हियौ सुख पावत,
 सो बड़ भागनवारौ ॥ १ ॥

तू जीवनधन सरबस तू ही,
 तुही दृगनकौ तारौ ।
 जो तोकों पलभर न निहारूँ,
 दीखत जग अँधियारौ ॥ २ ॥
 मोद बढ़ावनके कारन हम,
 मानिनि रूपहिं धारौ ।
 नारायन हम दोउ एक हैं,
 फूल सुगंध न न्यारौ ॥ ३ ॥

(९४) बिहाग

करु मन, नंदनँदनको ध्यान ।
 यहि अवसर तोहिं फिर न मिलैगौ,
 मेरौ कब्यौ अब मान ॥ १ ॥
 घूँघरवारी अलकै मुखपै,
 कुंडल झलकत कान ।
 नारायन अलसाने नैना,
 झूमत रूपनिधान ॥ २ ॥

(९५) झँझोटी

स्याम दृगनकी चोट बुरी री ।

ज्यों ज्यों नाम लेति तू वाकौ,

मो घायलपै नौन पुरी री ॥ १ ॥

ना जानौं अब सुध-बुध मेरी,

कौन त्रिपिनमें जाय दुरी री ।

नारायन नहिं छूटत सजनी,

जाकी जासों प्रीति जुरी री ॥ २ ॥

(९६) कान्हरा

नंदनँदनके ऐसे नैन ।

अति छबि भरे नागके छौना,

डरति उसै करि सैन ॥ १ ॥

इनसम सावर मंत्र न होई,

जादू, जंत्र, तंत्र नहिं कोई ।

एक दृष्टिमें मन हरि लेवै,

करि देवै बेचैन ॥ २ ॥

चितवनमें घायल करि डारै,
 इनपै कोटि बान लै वारै ।
 अति पैने, तिरछे हिय कसकै,
 खास न देवै लैन ॥ ३ ॥
 चंचल चपल मनोहर कारे,
 खंजन-मान-लजावन हारे ।
 नारायन सुन्दर, मतवारे,
 अनियारे, दुख-दैन ॥ ४ ॥

(९७) काफ़ी

या साँवरेसों में प्रीति लगाई ।
 कुल-कलंकतें नाहिं डरौंगी,
 अब्र तौ करौं अपनी मनभाई ॥ १ ॥
 बीच बजार पुकार कहाँ मैं,
 चाहै करौ तुम कोटि बुराई ।

लाज म्रजाद मिली औरनकों,

मृदु मुसकनि मेरे बट आई ॥ २ ॥

बिनु देखे मनमोहनकौ मुख,

मोहि लगत त्रिभुवन दुखदाई ।

नारायन तिनकों सब फीकौ,

जिन चाखी यह रूप-मिठाई ॥ ३ ॥

(९८)

बेदरदी, तोहि दरद न आवै ।

चितवनमें, चित बस करि मेरौ,

अब काहेकों आँख चुरावै ॥ १ ॥

कबसों परी द्वारपै तेरे,

बिन देखे जियरा घबरावै ।

नारायन महबूब साँवरे,

घायल करि फिर गैल बतावै ॥ २ ॥

(९९) नट

देख सखी नव छैल छबीलौ,
 प्रातसमय इतते को आवै ।
 कमलसमान बड़े दृग जाके,
 स्याम सलौनो मृदु मुसकावै ॥ १ ॥

जाकी सुन्दरता जग बरनत,
 मुख-सोभा लखि चंद लजावै ।
 नारायन यह किधौ वही है,
 जो जसुमतिकौ कुँवर कहावै ॥ २ ॥

(१००) ईमन

मोपै कैसी यह मोहिनी डारी ।
 चितचोर छैल गिरिधारी ॥

प्रहकारजमें जी न लगत है,
 खानपान लगै खारी ।
 निपट उदास रहत हौं जबते,
 सूरत देखि तिहारी ॥ १ ॥

संगकी सखी देति मोहिं धीरज,

बचन कहत हितकारी ।

एक न लगत कही काहूकी,

कहति कहति सत्र हारी ॥ २ ॥

रही न लाज सकुच गुरुजनकी,

तन-मन सुरति विसारी ।

नारायन मोहिं समुझि वावरी,

हँसत सकल नर-नारी ॥ ३ ॥

(१०१) कवित्त

चाहै तू योग करि भृकुटीमध्य ध्यान धरि,

चाहै नाम-रूप मिथ्या जानिकै निहार लै ।

निरगुन, निरभय, निराकार ज्योति व्याप रही,

ऐसो तत्त्वग्यान निज मनमें तू धार लै ॥ १ ॥

नारायन अपनेकौ आप ही बखान करि,

‘मोतें वह भिन्न नहीं’ या त्रिवि पुकार लै ।

जौलौं तोहि नन्दकौ कुमार नहिं दृष्टि पर्यौ,

तौलौं तू भलै बैठि ब्रह्मकौं विचार लै ॥ २ ॥

(१०२) विहाग

नयनों रे, चित-चोर बतावौ ।

तुमहीं रहत भवन रखवारे,

बाँके वीर कहावौ ॥ १ ॥

तुम्हरे बीच गयौ मन मेरौ,

चाहै सौँहैं खावौ ।

अब क्यों रोवत हौ दइमारे,

कहुँ तौ थाह लगावौ ॥ २ ॥

घरके भेदी बैठि द्वार पै,

दिनमें घर लुटवावौ ।

नारायन मोहि बस्तु न चाहिये,

लेनेहार दिखावौ ॥ ३ ॥

(१०३) लावनी

रूपरसिक, मोहन, मनोज-मन-

हरन, सकल-गुन-गरबीले ।

छैल-छबीले चपललोचन

चकोर चित चटकीले ॥टेक॥

रतनजटित सिर मुकुट लटक रहि

सिमट स्याम लट धुँधुरारी ।

बाल बिहारी कन्हैयालाल,

चतुर, तेरी बलिहारी ॥

लोलक मोती कान कपोलन

झलक बनी निरमल प्यारी ।

जोति उज्यारी, हमैं हरवार

दरस दै गिरिधारी ॥

बिज्जुछटा-सी दंतछटा मुख

देखि सरदससि सरमीले ।

छैल-छबीले, चपललोचन
 चकोर चित चटकीले ॥ १ ॥
 मंद हँसन, मृदु बचन तोतले
 बय किसोर भोली-भाली ।
 करत चोचले, अमोलक अधर
 पीक रच रही लाली ॥
 फूल गुलाब चिबुक सुंदरता,
 रुचिर कंठलत्रि बनमाली ।
 कर सरोजमें, बुंद मेंहँदी
 अति अमंद है प्रतिपाली ॥
 फूलछरी-सी नरम कमर कर-
 धनीसब्द हैं तुरसीले ।
 छैल-छबीले, चपललोचन
 चकोर चित चटकीले ॥ २ ॥
 झँगुली झीन जरीपट कछनी,
 स्यामल गात सुहात भले ।

चाल निराली, चरन कोमल-
 पंकजके पात भले ॥
 पग नूपुरझनकार परम उत्तम
 जसुमतिके तात भले ।
 संग सखनके, जमुनतट
 गो-बछरान चरात भले ॥
 ब्रज-जुवतिनकौ प्रेम निरखि कर
 घर-घर माखन गटकीले ।
 छैल-छबीले, चपललोचन
 चकोर चित चटकीले ॥ ३ ॥
 गावैं बाग-त्रिलस चरित हरि
 सरद-रैन रस-रास करैं ।
 मुनिजन मोहैं, कृष्ण, कंसादिक
 खल-दल नास करैं ॥
 गिरिधारी महाराज सदा श्री-
 ब्रजबृन्दावन बास करैं ।

हरिचरित्रकों सवन सुन सुन
 करि अति अभिलाष करै ॥
 हाथ जोरि करि करै ब्रीनती
 'नारायन' दिल दरदीले ।
 छैल-छुब्रीले, चपललोचन
 चकोर चित चटकीले ॥ ४ ॥

(१०४) कालिंगड़ा

मूरख, छाँड़ि बृथा अभिमान ।
 औसर बीति चल्यो है तेरौ, दो दिनकौ मेहमान ॥
 भूप अनेक भये पृथिवीपर, रूप तेज बलवान ।
 कौन बच्यौ या काल ब्यालतें मिटि गये नाम-निसान
 धवल धाम, धन, गज, रथ, सेना, नारी चंद्र समान ।
 अंत-समै सबहीकों तजिकै, जाय बसे समसान ॥
 तजि सतसंग भ्रमत त्रिषयनमें, जा बिधि मरकट खान
 छिन भरि बैठि न सुमिरन कीन्हों, जासों होय कल्यान
 रे मन मूढ़, अनत जनि भटकै, मेरौ कह्यौ अब मान ।
 नारायन ब्रजराज-कुँवरसों, बेगहि करि पहिचान ॥

(१०५)

टेर सुनों ब्रजराज-दुलारे ।

दीन मलीन हीन सब गुनते,

आय प्यो हौं द्वार तिहारे ॥ टेरे ॥

काम क्रोध अरु कपट मोह मद,

सो जाने निज प्रीतम प्यारे ।

भ्रमत रह्योँ सँग इन बिषयनके,

तुव पदकमल न मैं उर धारे ॥ १ ॥

कौन कुकर्म किये नहिं मैने,

जो गये भूल सो लिये उधारे ।

ऐसी खेप भरी रचि पचिकैँ,

चकित भये लखिकैँ बनिजारे ॥ २ ॥

अब तौ एकवार कहौ हँसिके,

आजहिते तुम भये हमारे ।

याहि कृपाते नारायनकी

बेगि लगैगी नाव किनारे ॥ ३ ॥

ललितकिशोरी

(१०६) झँझोटी

मन, पछितैहौ भजन त्रिनु कीने ।
 धन-दौलत कछु काम न आवै,
 कमलनयन-गुन चित त्रिनु दीने ॥ १ ॥
 देखतकौ यह जगत सँगाती,
 तात-मात अपने सुख भीने ।
 ललितकिशोरी दुंद मिटै ना,
 आनँदकंद त्रिना हरि चीने ॥ २ ॥

(१०७) गौरी

मुसाफिर, रैन रही थोरी ।
 जागु-जागु सुख-नाँद त्यागि दै,
 होत वस्तुकी चोरी ॥ १ ॥
 मंजिल दूरि भूरि भवसागर,
 मान कूर मति मोरी ।

ललितकिसोरी हाकिमसों डरु,
करै जोर बरजोरी ॥ २ ॥

(१०८) पीछू

अब का सोवै सखि ! जाग जाग ।
रैन बिहात जात रस बिरियाँ,
चोलीके बँद ताग ताग ॥ १ ॥
जोबन उमँग सफल कर बौरी,
आन-कान सब त्याग त्याग ।
ललितकिसोरी लूट अनँदवा,
पीतमके गर लाग लाग ॥ २ ॥

(१०९)

लटक लटक मनमोहन आवनि ।
झूमि झूमि पग धरत भूमिपर
गति मातंग लजावनि ॥ १ ॥
गोखुर-रेनु अंग अँग मंडित,
उपमा दग सकुचावनि ।

नव घनपै मनु झीन बदर्िया,
 सोभा रस बरसावनि ॥ २ ॥
 बिगसति मुखलौ कानि दामिनी,
 दसनावलि दमकावनि ।
 बीच-बीच घनघोर माधुरी,
 मधुरी बेनु बजावनि ॥ ३ ॥
 मुकतमाल उर लसी छत्रीली,
 मनु बग-पाँति सुहावनि ।
 बिंदु गुलाल गुपाल-कपोलन,
 इंद्रबधू छवि छावनि ॥ ४ ॥
 रुनन झुनन किंकिनि-धुनि मानों
 हंसनिकी चुहचावनि ।
 बिल्लित अलक धूरिधूसर तन,
 गमन लोटि भुव आवनि ॥ ५ ॥
 जँधिया लसनि कनक-कलनी पै,
 पटुका ऐँचि बँधावनि ।

पीतांबर फहरानि मुकुटछबि,
 नटवर बेस बनावनि ॥ ६ ॥
 हलनि बुलाक अधर तिरछौंही,
 वीरी सुरँग रचावनि ।
 ललितकिसोरी फूल-झरनिया
 मधुर मधुर बतरावनि ॥ ७ ॥

(११०) ईमन

साधो, ऐसिइ आयु सिरानी ।
 लगत न लाज लजावत संतन,
 करतहिं दंभ छदंब बिहानी ॥ १ ॥
 माला हाथ ललित तुलसी गर,
 अँग अँग भगवत छापसुहानी ।
 बाहिर परम बिराग भजनरत,
 अंतस मति पर-जुबति नसानी ॥ २ ॥
 मुखसों ग्यान-ध्यान बरनत बहु,
 कानन रति नित बिषय-कहानी ।

ललितकिसोरी कृपा करौ हरि,

हरि संताप सुहृद, सुखदानी ॥ ३ ॥

(१११) बिहाग

लाभ कहा कंचन तन पाये ।

भजे न मृदुल कमल-दल-लोचन,

दुख-मोचन हरि हरखि न ध्याये ॥ १ ॥

तन-मन-धन अरपन ना कीन्हों,

प्राण प्राणपति गुननि न गाये ।

जोबन, धन, कलधौत-धाम सब,

मिथ्या आयु गँवाय गँवाये ॥ २ ॥

गुरुजन गरब, बिमुख-रँग-राते,

डोलत सुख संपति बिसराये ।

ललितकिसोरी मिटै ताप ना,

बिनु दृढ़ चिंतामनि उर लाये ॥ ३ ॥

(११२)

मोहनके अति नैन नुकीले ।
 निकसे जात पार हियराके,
 निरखत निपट गँसीले ॥ १ ॥

ना जानौं बेधन अनियनकी,
 तीन लोकते न्यारी ।
 ज्यों ज्यों छिदत मिठास हियेमें,
 सुख लागत सुकुमारी ॥ २ ॥

जबसों जमुना कूल ब्रिजोक्त्यो,
 सब निसि नींद न आवै ।
 उठत मरोर बंक चितवनियाँ,
 उर उतपात मचावै ॥ ३ ॥

ललितकिसोरी आज मिले,
 जहवाँ कुलकानि विचारौं ।
 आग लगै यह लज निगोड़ी,
 दृग भरि स्याम निहारौं ॥ ४ ॥

(११३) खेमटा

रे निरमोही, छवि दरसाय जा ।

कान चातकी स्याम विरह घन,

मुरली मधुर सुनाय जा ॥ १ ॥

ललितकिसोरी नैन चकोरन,

दुति मुखचंद्र दिखाय जा ।

भयौ चहत यह प्रान बटोही,

रूसे पथिक मनाय जा ॥ २ ॥

(११४) कवित्त

लजीले, सकुचिले, सरसीले, सुरमीलेसे,

कटीले औ कुटीले, चटकीले, मटकीले हैं ।

रूपके लुभीले, कजरीले, उनमीले, बर-

छीले, तिरछीलेसे, फँसीले औ गँसीले हैं ॥

ललितकिसोरी झमकीले, गरबीले, मानों,

अति ही रसीले, चमकीले औ रँगीले हैं ।

छबीले, छकीले, अरु नीलेसे नसीले आली,

नैना नँदलालके नचीले औ नुकीले हैं ॥

(११५) झूलना

दुनियाके परपंचोंमें हम
मजा नहीं कछु पाया जी ।

भाई-बंधु पिता-माता, पति,
सबसों चित अकुलाया जी ॥

छोड़-छाड़ घर, गाँव-नाँव कुल,
यही पंथ मनभाया जी ।

ललितकिसोरी आनँदघन सों
अब हठि नेह लगाया जी ॥ १ ॥

क्या करना है संतति-संपति,
मिथ्या सब जग माया है ।

शाल-दुशाले, हीरा-मोती-
में मन क्यों भरमाया है ॥

माता-पिता, पती-बंधू सब
 गोरखबंध बनाया है ।
 ललितकिसोरी आनंदघन हरि
 हिरदै कमल बसाया है ॥ २ ॥
 वन-वन फिरना बिहतर हमको
 रतनभवन नहिं भावै हैं ।
 लतातरे पड़ रहनेमें सुख
 नाहिन सेज सुहावै है ॥
 सोना कर धरि सीस भला अति
 तकिया ग्याल न आवै है ।
 ललितकिसोरी नाम हरीका
 जपि-जपि मन सचुपावै है ॥ ३ ॥
 तजि दीनीं जब दुनियाँ-दौलत
 फिर कोईके घर जाना क्या ।
 कंद-मूल-फल पाय रहैं अब
 खड़ा-मीठा खाना क्या ॥

छिनमें साही बकसैँ हमको
 मोती-माल-खजाना क्या ।
 ललितकिसोरी रूप हमारा
 जानैँ ना तहँ आना क्या ॥ ४ ॥
 अष्टसिद्धि नवनिद्धि हमारी
 मुट्टीमें हरदम रहतीं ।
 नहीं जवाहिर, सोना-चाँदी,
 त्रिभुवनकी संपत्ति चहतीं ॥
 भावैँ ना दुनियाकी बातें
 दिलवरकी चरचा सहती ।
 ललितकिसोरी पार लगावैँ
 मायाकी सरिता बहती ॥ ५ ॥
 गौर-स्याम बदनारबिंदपर
 जिसको बीर मचलते देखा ।
 नैन-बान, मुसक्यान संग फँस
 फिर नहिं नेक सँभलते देखा ॥

ललितकिसोरी जुगुल इश्कमें
 बहुतोंका घर घलते देखा ।
 डूबा प्रेमसिंधुका कोई
 हमने नहीं उछलते देखा ॥ ६ ॥
 देखौ री, यह नंदका छोरा
 बरछी मारे जाता है ।
 बरछी-सी तिरछी चितवनकी
 पैनी छुरी चलाता है ॥
 हमको घायल देख बेदरदी
 मंद-मंद मुसकाता है ।
 ललितकिसोरी जखम जिगरपर
 नौनपुरी बुरकाता है ॥ ७ ॥
 (११६) सारंग
 मुरकि मुरकि चितवनि चित चोरै ।
 ठुमकि चळन हेरी दै बोलनि,
 पुलकनि नंदकिसोरै ॥ १ ॥

सहरावनि गैयान चौकनी,
 थपकन कर बनमाली ।
 गुहरावनि लै नाम सबनकौ,
 धौरी धूमर आली ॥ २ ॥
 चुचकारनि चट झपटि बिचुकनी,
 हूँ हूँ रहौ रँगीली ।
 नियरावनि चोरवनि मगहीमें,
 झुकि बछियान छत्रीली ॥ ३ ॥
 फिरकैयाँ लै निरत अलापन,
 बिच बिच तान रसीली ।
 चितवनि ठिठुकि उढकि गैयासों,
 सीटी भरनि रसीली ॥ ४ ॥
 चाँपन अधर सैन दै चंचल,
 नैनन मेलि कटारी ।
 जोरन कर हा हा करि मोहन,
 मुसकन ऐँड़ि बिहारी ॥ ५ ॥
 बाँह उठाय उचकि पग टेरनि,
 इतै कितै हौ स्यामा ।

निकसी नई आज तैं बनरिहु,
मोरे ढिग अभिरामा ॥ ६ ॥

हरुवे खोर साँकरी जुवतिन,
कहत गुलाम तिहारौ ।

मिलियौ रैन मालती कुंजै,
तहँ पिक अरुन निहारौ ॥ ७ ॥

काहू झटक चीर लकुटीतें,
काहू पंगे दबावै ।

काहू अंग परसि काहू तन,
नैनन कोर नचावै ॥ ८ ॥

उरझत पट नूपुरसों पाछे
झुकि झुकि कै सुरझावै ।

ललितकिसोरी ललित लाड़िली,
दृग संकेत बतावै ॥ ९ ॥

(११७) खमाच

नैन चकोर, मुखचंदहूकों बारि डारौं,
बारि डारौं चित्तहिं मनमोहन चितचोरपै ।

प्रानहूकों बारि डारौँ हँसन दसन लाल,
 हेरन कुटिलता औ लोचनकी कोरपै ॥१॥
 बारि डारौँ मनहिं सुअंग अँग स्यामा-स्याम,
 महल मिलाप रस रासकी झकोरपै ।
 अतिहि सुघर बर सोहत त्रिभंगीलाल,
 सरबस बारौँ वा ग्रीवाकी मरोरपै ॥२॥

(११८)

अब तौ तेरिय हाथ बिकानी ।
 मृदु बोलन मुसक्यान माधुरी,
 तन मन नैन समानी ॥ १ ॥
 लोक-लाज, कुल-कानि तजी सब,
 जामें तुव रुचि चीनी ।
 धरम-करम ब्रत-नेम सबै सो,
 तोई रँग-रस भीनी ॥ २ ॥
 तुव कारन यह भेष बनायौ,
 प्रगट उघरि करि नाची ।

नाउँ कुनाउँ धरौ किन कोऊ,
 हौं नाहिन मति काँची ॥ ३ ॥
 होनी होय सो होय भले ही,
 तन-मन लगन लगी है ।
 ललितकिसोरी लाल तिहारे,
 मति अनुराग पगी है ॥ ४ ॥

(११९) अल्हैया

मैं तुव पदतर रेनु रसीली ।
 तेरी सरवरि कौन करि सकै,
 प्रेममई मूरति गरबीली ॥ १ ॥
 कोटिहु प्रान वारनें करिकै,
 उरिन न तोसों प्रीति रँगीली ।
 अपनी प्रेम-छटा करुना करि,
 दीजै दान दयाल छत्रीली ॥ २ ॥
 का मुख करौ बड़ाई राई,
 ललितकिसोरी केलि हठीली ।
 प्रीति दसांस सतांस तिहारी,
 मोमें नाहिन नेह नसीली ॥ ३ ॥

(१२०) प्रभाती

कमलमुख खोलौ आजु पियारे ।
 बिगसित कमल कुमोदिनि मुकल्लि,
 अल्लिगन मत्त गुँजारे ॥ १ ॥
 प्राची दिसि रवि थार आरती
 लिये ठनी निवछारे ।
 ललितकिसोरी सुनि यह बानी
 कुरकुट बिसद पुकारे ।
 रजनी राज बिदा माँगै बलि,
 निरखौ पलक उधारे ॥ २ ॥

(१२१) अल्लैया

अब कुलकानि तजेही बनैगी ।
 पलक-ओट सत कोटि कल्प सम,
 बिछुरत हिये कंटारि हनैगी ॥ १ ॥
 ललितकिसोरी अंत एक दिन,
 तजिबेई जब तान तनैगी ।
 फिर का सोच देहु तिल अंजुलि,
 लेहु अंक रसकेलि छनैगी ॥ २ ॥

ॐ श्रीपरमात्मने नमः

भजन-संग्रह

दूसरा भाग (दूसरा खण्ड)



दादूदयाल

(१२२) गौरी

मेरे मन भैया राम कहौ रे ॥ टेक ॥

रामनाम मोहिं सहजि सुनावै ।

उनहिं चरण मन कीन रहौ रे ॥ १ ॥

रामनाम ले संत सुहावै ।

कोई कहै सब सीस सहौ रे ॥ २ ॥

वाहीसों मन जोरे राखौ ।

नीकै रासि लिये निबहौ रे ॥ ३ ॥

कहत-सुनत तेरौ कछु न जावै ।

पाप निलेदन सोई लहौ रे ॥ ४ ॥

दादू रे जन हरि-गुण गावो ।

कालहि जालहि फेरि दहौ रे ॥ ५ ॥

(१२३)

बिरहणिकौ सिंगार न भावै ।

है कोइ ऐसा राम मिलावै ॥ टेक ॥

बिसरे अंजन-मंजन, चीरा ।

बिरह-बिथा यह व्यापै पीरा ॥ १ ॥

नौसत थाके सकल सिंगारा ।

है कोइ पीड़ मिटावनहारा ॥ २ ॥

देह-गेह नहिं सुद्धि सरीरा ।

निसदिन चितवत चातक नीरा ॥ ३ ॥

दादू ताहि न भावत आना ।

राम बिना भई मृतक समाना ॥ ४ ॥

(१२४)

तौलगि जिनि मारै तू मोहिं ।

जौलगि मैं देखौं नहिं तोहिं ॥ टेक ॥

इबके बिछुरे मिलन कैसे होइ ।

इहि विधि बहुरि न चीन्है कोइ ॥१॥

दीनदयाल दया करि जोइ ।

सब सुख-आनंद तुम सँ होइ ॥२॥

जनम-जनमके बंधन खोइ ।

देखण दादू अहि निशि रोइ ॥३॥

(१२५)

संग न छाँड़ौ मेरा पावन पीव ।

मैं बलि तेरे जीवन जीव ॥ टेक ॥

संगि तुम्हारे सब सुख होइ ।

चरण-कँवल मुख देखौं तोहि ॥१॥

अनेक जतन करि पाया सोइ ।

देखौं नैनौं तौ सुख होइ ॥२॥

सरण तुम्हारी अंतरि वास ।

चरण-कँवल तहँ देहु निवास ॥३॥

अब दादू मन अनत न जाइ ।

अंतर बेधि रह्यौ लौ लाइ ॥४॥

(१२६)

ऐसा राम हमारे आवै ।

वार पार कोइ अंत न पावै ॥ टेक ॥

हलका भारी कह्या न जाइ ।

मोल-माप नहिं रह्या समाइ ॥ १ ॥

कीमत-लेखा नहिं परिमाण ।

सब पचि हारे साध सुजाण ॥ २ ॥

आगौ पीछौ परिमित नाहीं ।

केते पारिष आवहिं जाहीं ॥ ३ ॥

आदि-अंत-मधि लखै न कोइ ।

दादू देखे अचरज होइ ॥ ४ ॥

(१२७)

राम रस मीठा रे, कोइ पीवै साधु सुजाण ।

सदा रस पीवै प्रेमसुँ, सो अबिनासी प्राण ॥ टेक ॥

इहि रस मुनि लागे सबै, ब्रह्मा-बिसुन-महेस ।
 सुर-नर साधू-संत जन, सो रस पीवै सेस ॥१॥
 सिध-साधक जोगी-जती, सती सबै सुखदेव ।
 पीवत अंत न आवई, ऐसा अलख अभेव ॥२॥
 इहि रस राते नामदेव, पीपा अरु रैदास ।
 पिवत कबीरा ना थक्या, अजहूँ प्रेम पियास ॥३॥
 यह रस मीठा जिन पिया, सो रसही माहिं समाइ ।
 मीठे मीठा मिलि रह्या, दादू अनत न जाइ ॥४॥

(१२८)

सोई सुहागनि साँच सिँगार ।
 तन-मन लाइ भजै भरतार ॥टेका॥
 भाव-भगत प्रेम-लौ लावै ।
 नारी सोई सुख पावै ॥ १ ॥
 सहज सँतोष सील जब आया ।
 तब नारी नाह अमोलिक पाया ॥ २ ॥

तन मन जोवन सौंपि सब दीन्हा ।

तब कंत रिझाइ आप बस कीन्हा ॥ ३ ॥

दादू बहुरि बियोग न होई ।

पिवसूँ प्रीति सुहागनि सोई ॥ ४ ॥

(१२९)

तब हम एक भये रे भाई ।

मोहन मिल साँची मति आई ॥ टेक ॥

पारस परस भये सुखदाई ।

तब दुनिया दुरमत दूरि गमाई ॥ १ ॥

मलयागिरी भरम मिलि पाया ।

तब वंस-वरण-कुल भरम गँवाया ॥ २ ॥

हरि जल नीर निकट जब आया ।

तब बूँद बूँद मिल सहज समाया ॥ ३ ॥

नाना भेद भरम सब भागा ।

तब दादू एक रंगै रँग लगा ॥ ४ ॥

(१३०)

इत है नीर नहावन जोग ।

अनतहिं भरम भूला रे लोग ॥टेक॥

तिहि तटि न्हाये निर्मल होइ ।

वस्तु अगोचर लखै रे सोइ ॥ १ ॥

सुघट घाट अरु तिरिबौ तीर ।

बैठे तहाँ जगत-गुर पीर ॥ २ ॥

दादू न जाणै तिनका भेव ।

आप लखावै अंतर देव ॥ ३ ॥

(१३१) माली गौड़ी

मेरा मेरा छोड़ गँवारा,

सिरपर तेरे सिरजनहारा ।

अपने जीव बिचारत नाहीं,

क्या ले गइला वंस तुम्हारा ॥टेक॥

तब मेरा कत करता नाहीं,

आवत है हंकारा ।

काल-चक्रसँ खरी परी रे,
 बिसर गया घर-बारा ॥ १ ॥
 जाइ तहाँ का संयम कीजै,
 बिकट पंथ गिरधारा ।
 दादू रे तन अपना नाहीं,
 तौ कँमें भयो सँसारा ॥ २ ॥

(१३२) कल्यान

जगसँ कहा हमारा । जब देख्या नूर तुम्हारा ॥ टेका ॥
 परम तेज घर मेरा । सुख-सागर माहिं बसेरा ॥ १ ॥
 झिलमिलि अति आनंदा । पाया परमानंदा ॥ २ ॥
 जोति अपार अनंता । खेलै फाग बसंता ॥ ३ ॥
 आदि अंत असथाना । दादू सो पहिचाना ॥ ४ ॥

(१३३) कान्हड़ा

आव पियारे मीत हमारे ।
 निस-दिन देखूँ पाँव तुम्हारे ॥ टेका ॥

सेज हमारी पीव सँवारी ।

दासि तुम्हारी सो धन वारी ॥ १ ॥

जे तुझ पाऊँ अंग लगाऊँ ।

क्यूँ समझाऊँ बारण जाऊँ ॥ २ ॥

पंथ निहारूँ बाट सँवारूँ ।

दादू तारूँ तन मन वारूँ ॥ ३ ॥

(१३४) केदारा

अरे मेरा अमर उपावणहार रे ।

खालिक आशिक तेरा ॥टेका॥

तुमसूँ राता तुमसूँ माता ।

तुमसूँ लागा रंग रे खालिक ॥ १ ॥

तुमसूँ खेला तुमसूँ मेला ।

तुमसूँ प्रेम-सनेह रे खालिक ॥ २ ॥

तुमसूँ लैणा तुमसूँ दैणा ।

तुमहींसूँ रत होइ रे खालिक ॥ ३ ॥

खालिक मेरा आसिक तेरा ।

दादू अनत न जाइ रे खालिका ॥ ४ ॥

(१३५)

बटाऊ रे चलना आज कि काल ।

समझ न देखै कहा सुख सोवै,

रे मन राम सँभाल ॥ टेका ॥

जैसै तरवर बिरख बसेरा,

पंखी बैठे आइ ।

ऐसै यह सव हाट पमारा,

आप आप कूँ जाइ ॥ १ ॥

कोइ नहिं तेरा सजन सँगाती,

जिनि खोवै मन मूल ।

यह संसार देखि मत भूलै,

सबही सेबल फूल ॥ २ ॥

तन नहिं तेरा, धन नहिं तेरा,

कहा रह्यो इहिं लागि ।

दादू हरि बिन क्युँ सुख सोवै,
काहे न देखै जागि ॥ ३ ॥

(१३६)

कोइ जानै रे मरम माधइया केरौ ।
कैसेँ रहै करै का सजनी प्राण मेरौ ॥टेका॥

कौण बिनोद करत री सजनी,
कौणनि संग बसेरौ ।

संत-साध गति आये उनके,
करत जु प्रेम घनेरौ ॥ १ ॥

कहाँ निवास बास कहँ,
सजनी गवन तेरौ ।

घट-घट माहँ रहै निरंतर,
ये दादू नेरौ ॥ २ ॥

(१३७) मारू

क्यों बिसरै मेरा पीव पियारा ।

जीवकी जीवन प्राण हमार ॥टेका॥

क्योंकर जीवै मीन जल बिछुरें,
 तुम बिन प्राण सनेही ।
 चिंतामणि जब करतैं छूटै,
 तब दुख पावै देही ॥ १ ॥
 माता बालक दूध न देवै,
 सो कैसें करि पीवै ।
 निरधनका धन अनत भुलाना,
 सो कैसे करि जीवै ॥ २ ॥
 बरखहु राम सदा सुख अमरित,
 नीझर निरमल धारा ।
 प्रेम पियाला भर भर दीजै,
 दादू दास तुम्हारा ॥ ३ ॥

(१३८)

कबहूँ ऐसा बिरह उपावै रे ।
 पिय बिन देखैं जीव जावै रे ॥टेका॥

बिपत हमारी सुनौ सहेली ।

पिव बिन चैन न आवै रे ॥

ज्यौं जल मीन भीन तन तळफै ।

पिव बिन बज्र बिहावै रे ॥ १ ॥

ऐसी प्रीति प्रेमको लगै ।

ज्यौं पंग्वी पीव सुनावै रे ॥

त्यौं मन मेरा रहै निसबासुर ।

कोइ पीवकूँ आणि मिळवै रे ॥ २ ॥

तौ मन मेरा धीरज धरई ।

कोइ आगम आणि जणावै रे ॥

तौ सुख जीव दादूका पावै ।

पळ पिवर्जा आप दिग्वावै रे ॥ ३ ॥

(१३९)

जागि रे सब रैण बिहाणी ।

जाइ जनम अँजुलीको पाणी ॥टेका॥

घड़ी घड़ी घड़ियाल बजावै ।
 जे दिन जाइ सो बहुरि न आवै ॥ १ ॥

सूरज-चंद्र कहैं समझाड ।
 दिन-दिन आव घटती जाइ ॥ २ ॥

सरवर-पाणी तरवर-छाया ।
 निसदिन काल गरासै काया ॥ ३ ॥

हंस बटाऊ प्राण पयाना ।
 दादू आतम राम न जाना ॥ ४ ॥

(१४०) रामकली

अहो नर नीका है हरिनाम ।
 दूजा नहीं नाँउ त्रिन नीका, कहिले केवल राम । टेका
 निरमल सदा एक अविनासी, अजर अकल रस ऐसा
 दृढ़ गहि राखि मूल मन माहीं, निरख देखि निज कैसा
 यह रस मीठा महा अमीरस, अमर अनूपम पीवै ।
 राता रहै प्रेमसँ माता, ऐसैं जुगि जुगि जीवै ॥ २ ॥

दूजा नहीं और को ऐसा, गुर अंजन करि सूझै ।
दादू मोटे भाग हमारे, दास बमेकी बूझै ॥ ३ ॥

(१४१)

पंडित राम मिलै सो कीजै ।
पढ़ि-पढ़ि बेद पुराण बखाने,
सोई तत कहि दीजै ॥टेका॥
आतम रोगी विषम बियाधी,
सोइ करि औषध सारा ।
परसत प्राणी होइ परम सुख,
छूटै सब संसारा ॥ १ ॥
ये गुण इंद्रि अग्नि अपारा,
तासन जले सरीरा ।
तन-मन सीतल होइ सदा सुख,
सो जल नात्रौ नीरा ॥ २ ॥
सोई मारग हमहिं बतावौ,
जिहिं पैथ पहुँचै पारा ।

भूल न परै उलट नहिं आवै,
 सो कुछ करहु विचारा ॥ ३ ॥
 गुर उपदेस देहु कर दीपक,
 तिमर मिटै सब सूझै ।
 दादू सोई पंडित ग्याता,
 राम-मिलनकी बूझै ॥ ४ ॥

(१४२) आसावरी

तूँहीं मेरे रसना तूँहीं मेरे ब्रैना ।
 तूँहीं मेरे स्रवना तूँहीं मेरे नैना ॥ टेका ॥
 तूँहीं मेरे आतम कँवल मँझारी ।
 तूँहीं मेरे मनसा तुम्ह परिवारी ॥ १ ॥
 तूँहीं मेरे मनहीं, तूँहीं मेरे साँसा ।
 तूँहीं मेरे सुरतैं प्राण निवासा ॥ २ ॥
 तूँहीं मेरे नख-सिख सकल सरीरा ।
 तूँहीं मेरे जिय रे ज्यूँ जल नीरा ॥ ३ ॥
 तुम्ह बिन मेरे और कोइ नाहीं ।
 तूँहीं मेरी जीवनि दादू माँहीं ॥ ४ ॥

(१४३)

बाबा नहीं दूजा कोई ।
 एक अनेकन नाँव तुम्हारे, मोपैँ और न होई ॥ टेक ॥
 अलख इलाही एक तूँ, तूँहीं राम रहीम ।
 तूँहीं मालिक मोहना, कैसो नाँउ करीम ॥ १ ॥
 साँई सिरजनहार तूँ, तूँ पावन तूँ पाक ।
 तूँ काइम करतार तूँ, तूँ हरिहाजिर आप ॥ २ ॥
 रमिता राजिक एक तूँ, तूँ सारँग सुबहान ।
 कादिर करता एक तूँ, तूँ साहिब सुलतान ॥ ३ ॥
 अविगत अल्लह एक तूँ, गनी गुसाईँ एक ।
 अजब अनूपम आप है, दादू नाँव अनेक ॥ ४ ॥

(१४४) देवगंधार

मन मूरिखा तैं यौँहीं जनम गँवायौ ।
 साँईकेरी सेवा न कीन्हीं,
 इहि कलि काहेकूँ आयौ ॥ टेक ॥

जिन बातन तेरौ छूटिक नाहीं,
 सोई मन तेरो भायौ ।
 कामी है विषयासँग लाग्यो,
 रोम रोम लपटायौ ॥ १ ॥
 कुछ इक चेति विचारी देखौ,
 कहा पाप जिय लायौ ।
 दादूदास भजन करि लीजै,
 सुपिने जग डहकायौ ॥ २ ॥

(१४५) परज

नूर रखा भरपूर, अमीरस पीजिये ।
 रस मोहै रस होइ, लाहा लीजिये ॥टेका॥
 परगट तेज अनंत, पार नहिं पाइये ।
 झिलिमिलि झिलिमिलि होइ, तहाँ मन लाइये ॥ १ ॥
 सहजै सदा प्रकास, ज्योति जल पूरिया ।
 तहाँ रहै निज दास, सेवग सूरिया ॥ २ ॥

सुख-सागर वार न पार, हमारा बास है ।
हंस रहै ता माहिं, दादू दास है ॥ ३ ॥

(१४६) टोड़ी

तूँ साँचा साहिब मेरा ।
करम करीम कृपाल निहारौ, मैं जन बंदा तेरा ॥टेका॥
तुम दीवान सबहिनकी जानौं, दीनानाथ दयाला ।
दिखाइ दीदार मौज बंदेकूँ, काइम करौ निहाला ॥
मालिक सबै मुलिकके साँई, समरथ सिरजनहारा ।
खैर खुदाइ खलकमें खेलत, दे दीदार तुम्हारा ॥
मैं सिकस्ता दरगह तेरी, हरि हजूर तूँ कहिये ।
दादू द्वारै दीन पुकारै, काहे न दरसन लहिये ॥

(१४७) बिलावल

सोई साध-सिरोमणी, गोत्रिँद गुण गावै ।
राम भजै बिषिया तजै, आपा न जनावै ॥टेका॥
मिथ्या मुख बोलै नहीं, पर-निंघा नाहीं ।
औगुण छोड़ै गुण गहै, मन हरि-पदमाहीं ॥ १ ॥

निरबैरी सब आतमा, पर आतम जानै ।
 सुखदाई समता गहै, आपा नहिं आनै ॥ २ ॥
 आपा पर अंतर नहीं, निरमल निज सारा ।
 सतबादी साचा कहै, लैलीन बिचारा ॥ ३ ॥
 निरभै भज न्यारा रहै, काहू लिपत न होई ।
 दादू सब संसारमें, ऐसा जन कोई ॥ ४ ॥

(१४८) गौरी

हिंदू तुरक न जाणौं दोइ ।
 साँई सबका सोई है रे,
 और न दूजा देखौं कोइ ॥टेका॥
 कीट-पतंग सबै जोनिनमें,
 जल-थल संगि समाना सोइ ।
 पीर पैगंबर देवा-दानव,
 मीर-मलिक मुनि-जनकों मोहि ॥ १ ॥

करता है रे सोई चीन्हौ,
 जिन वै क्रोध करै रे कोइ ।
 जैसे आरसी मंजन कीजै,
 राम-रहीम देही तन धोइ ॥ २ ॥
 साँईकेरी सेवा कीजै,
 पायौ धन काहेकौँ खोइ ।
 दादू रे जन हरि भज लीजै,
 जनम जनम जे सुरजन होइ ॥ ३ ॥



रैदास

(१४९)

गाइ गाइ अब का कहि गाऊँ ।

गावनहार को निकट बताऊँ ॥टेका॥

जबलग है या तनकी आसा,

तबलग करै पुकारा ।

जब मन मिल्यौ आस नहिं तनकी,

तब को गावनहारा ॥ १ ॥

जबलग नदी न समुद समावै,

तबलग बढ़ै हँकारा ।

जब मन मिल्यौ राम-सागरसों,

तब यह मिटी पुकारा ॥ २ ॥

जबलग भगति मुकतिकी आसा,

परम तत्त्व सुनि गावै ।

जहँ-जहँ आस धरत है यह मन,

तहँ-तहँ कछु न पावै ॥ ३ ॥

छाड़ै आस निरास परमपद,
 तब सुख सति कर होई ।
 कह रैदास जासों और करत है,
 परम तत्त्व अब सोई ॥ ४ ॥

(१५०)

ऐसो कछु अनुभव कहत न आवै ।
 साहिब मिलै तो को बिलगावै ॥ टेक ॥
 सबमें हरि है हरिमें सब है,
 हरि अपनो जिन जाना ।
 साखी नहीं और कोइ दूसर,
 जाननहार सयाना ॥ १ ॥
 बाजीगरसों राचि रहा,
 बाजीका मरम न जाना ।
 बाजी झूठ साँच बाजीगर,
 जाना मन पतियाना ॥ २ ॥

मन थिर होइ तो कोइ न सूझै,

जानै जाननहारा ।

कह रैदास त्रिमल त्रिवेक सुख,

सहज सरूप सँभारा ॥ ३ ॥

(१५१)

जब रामनाम कहि गावैगा,

तब भेद अमेद समावैगा ॥टेका॥

जे सुख है या रसके परसे,

सो सुख का कहि गावैगा ॥ १ ॥

गुरु परसाद भई अनुभौ मति,

त्रिष अमरित सम धावैगा ॥ २ ॥

कह रैदास भेटि आपा-पर,

तब वा ठौरहि पावैगा ॥ ३ ॥

(१५२)

रामा हो जग जीवन मोरा ।

तूँ न बिसारि राम मैं जन तोरा ॥टेका॥

संकट सोच पोच दिनराती ।

करम कठिन मोरि जाति कुजाती ॥ १ ॥

हरहु बिपति भावै करहु सो भाव ।

चरण न छाड़ौ जाव सो जाव ॥ २ ॥

कह रैदास कछु देहु अलंबन ।

बेगि मिलौ जनि करो विलंबन ॥ ३ ॥

(१५३)

अब हम खूब वतन घर पाया ।

ऊँचा खेड़ा सदा मेरे भाया ॥टेका॥

बेगमपूर सहरका नाम

फिकर अँदेश नहीं तेहि ग्राम ॥ १ ॥

नहिं जहाँ साँसत लानत मार ।

हैफ न खता न तरस जवाल ॥ २ ॥

आव न जान रहम औजूद ।

जहाँ गनी आप बसै माबूद ॥ ३ ॥

जोई सैलि करै सोई भावै ।

मरहम महलमें को अटकावै ॥ ४ ॥

कह रैदास खलास चमारा ।

जो उस सहर सो मीत हमारा ॥ ५ ॥

(१५४)

राम मैं पूजा कहा चढ़ाऊँ ।

फल अरु फूल अनूप न पाऊँ ॥ टेका ॥

धनतर दूध जो बछरू जुठारी ।

पुहुप भँवर जल मीन बिगारी ॥ १ ॥

मलयागिर बेधियो मुअंगा ।

बिष अमृत दोउ एकै संग ॥ २ ॥

मन ही पूजा मन ही धूप ।

मन ही सेऊँ सहज सरूप ॥ ३ ॥

पूजा अरचा न जानूँ तेरी ।

कह रैदास कवन गति मेरी ॥ ४ ॥

(१५५)

देहु कलाली एक पियाला ।

ऐसा अबधू है मतवाला ॥टेका॥

हे रे कलाली तैं क्या किया ।

सिरका-सा तैं प्याला दिया ॥ १ ॥

कहै कलाली प्याला देऊँ ।

पीवनहारेका सिर लेऊँ ॥ २ ॥

चंद-सूर दोउ सनमुख होई ।

पीवै प्याला मरै न कोई ॥ ३ ॥

सहज सुनमें भाठी सखे ।

पावै रैदास गुरुमुख दखे ॥ ४ ॥

(१५६)

पार गया चाहै सब कोई ।

रहि उर वार पार नहिं होई ॥टेका॥

पार कहै उर वारसे पारा ।

बिन पद परचे भ्रमै गँवारा ॥ १ ॥

पार परम पद मंझ सुरारी ।

तामें आप रमै बनवारी ॥ २ ॥

पूरन ब्रह्म बसै सब ठाई ।

कह रैदास मिलै सुख साई ॥ ३ ॥

(१५७)

यह अंदेस सोच जिय मेरे ।

निसिबासर गुन गाऊँ तेरे ॥टेक॥

तुम चिंतत मेरी चिंतहु जाई ।

तुमचिंतामनि हौ इक नाई ॥ १ ॥

भगत-हेत का का नहिं कीन्हा ।

हमरी बेर भये बलहीना ॥ २ ॥

कह रैदास दास अपराधी ।

जेहि तुम द्रवौ सो भगति न साधी ॥ ३ ॥

(१५८)

जो तुम तोरौ राम मैं नाहिं तोरीं ।

तुमसे तोरि कवनसे जोरीं ॥टेक॥

तीरथ बरत न करौं अँदेसा ।

तुम्हरे चरन कमल क भरोसा ॥ १ ॥

जहँ जहँ जाओं तुम्हरी पूजा ।

तुम-सा देव और नहिं दूजा ॥ २ ॥

मैं अपनो मन हरिसों जोरघों ।

हरिसों जोरि सबनसों तोरघों ॥ ३ ॥

सबही पहर तुम्हारी आसा ।

मन क्रम बचन कहै रैदासा ॥ ४ ॥

(१५९)

सो कहा जानै पीर पराई ।

जाके दिलमें दरद न आई ॥टेका॥

दुखी दुहागिनि होइ पियहीना,

नेह निरति करि सेव न कीना ।

स्याम-प्रेमका पंथ दुहेला,

चलन अकेला कोइ संग न हेला ॥ १ ॥

सुखकी सार सुहागिनि जानै,
 तन-मन देय अंतर नहिं आनै ।
 आन सुनाय और नहिं भाषै,
 राम रसायन रसना चाखै ॥ २ ॥
 खालिक तौ दरमंद जगाया,
 बहुत उमेद जवाब न पाया ।

कह रैदास कवन गति मेरी,
 सेवा बंदगी न जानूँ तेरी ॥ ३ ॥

(१६०) गौड़

आज दिवस लेऊँ बलिहारा ।
 मेरे घर आया रामका प्यारा ॥टेका॥
 आँगन बँगला भवन भयो पावन ।
 हरिजन बैठे हरिजस गावन ॥ १ ॥
 करूँ डंडवत चरन पखारूँ ।
 तन-मन-धन उन ऊपरि वारूँ ॥ २ ॥

कथा कहैं अरु अरथ बिचारैं ।

आप तरैं औरनको तारैं ॥ ३ ॥

कह रैदास मिलैं निज दासा ।

जनम जनमकै काटैं पासा ॥ ४ ॥

(१६१)

कवन भगतिते रहै प्यारो पाहुनो रे

घर घर देखों मैं अजब अभावनो रे ॥ टेका ॥

मैला मैला कपड़ा केता एक धोऊँ ।

आवै आवै नीदहि कहाँलों सोऊँ ॥ १ ॥

ज्यों ज्यों जोड़ै त्यों त्यों फाटै ।

झूठै सबनि जरै उठि गयो हाटै ॥ २ ॥

कह रैदास परो जब लेख्यौ ।

जोई जोई कियो रे सोई सोई देख्यौ ॥ ३ ॥

(१६२)

अब कैसे छुटै नाम रट लागी ॥टेक॥

प्रभुजी, तुम चंदन, हम पानी ।

जाकी अँग अँग ब्रास समानी ॥ १ ॥

प्रभुजी, तुम घन बन, हम मोरा ।

जैसे चितवत चंद चकोरा ॥ २ ॥

प्रभुजी, तुम दीपक, हम बाती ।

जाकी जोति बरै दिन राती ॥ ३ ॥

प्रभुजी, तुम मोती, हम धागा ।

जैसे सोनहि मिलत सुहागा ॥ ४ ॥

प्रभुजी, तुम स्वामी, हम दासा ।

ऐसी भगति करै रैदासा ॥ ५ ॥



मल्लूकदास

(१६३)

हरि समान दाता कोउ नाहीं ।

सदा बिराजै संतनमाहीं ॥ १ ॥

नाम बिसंभर, बिस्व जियावै ।

साँझ बिहान रिजिक पढुँचावै ॥ २ ॥

देइ अनेकन मुखपर ऐने ।

औगुन करै सो गुन करि मानै ॥ ३ ॥

काहू भौंति अजार न देई ।

जाहीको अपना कर लेई ॥ ४ ॥

घरी घरी देता दीदार ।

जन अपनेका खिजमतगार ॥ ५ ॥

तीन लोक जाके औसाफ ।

जनका गुनह करै सब माफ ॥ ६ ॥

गरुवा ठाकुर है रघुराई ।

कहै मल्लूक क्या करुँ बड़ाई ॥ ७ ॥

(१६४)

सदा सोहागिन नारि सो, जाके राम भतारा ।
 मुख माँगे सुख देत हैं, जगजीवन प्यारा ॥ १ ॥
 कबहुँ न चढ़ै रँडपुरा, जानै सब कोई ।
 अजर अमर अबिनासिया, ताकौ नास न होई ॥ २ ॥
 नर-देही दिन दोगकी, सुन गुरुजन मेरी ।
 क्या ऐसोंका नेहरा, मुए बिपति घनेरी ॥ ३ ॥
 ना उपजै ना बीनसै, संतन सुखदाई ।
 कहैं मल्लूक यह जानिकौ, मैं प्रीति लगाई ॥ ४ ॥

(१६५)

अब तेरी सरन आयो राम ॥ १ ॥
 जबै सुनियो साधके मुख, पतित-पावन नाम ॥ २ ॥
 यही जान पुकार कीन्ही, अति सतायो काम ॥ ३ ॥
 बिषयसेती भयो आजिज कह मल्लूक गुलाम ॥ ४ ॥

(१६६)

साँचा तू गोपाल, साँच तेरा नाम है ।
 जहवाँ सुमिरन होय, धन्य सो ठाम है ॥ १ ॥
 साँचा तेरा भगत, जो तुझको जानता ।
 तीन लोककौ राज, मनै नहिं आनता ॥ २ ॥
 झूठा नाता छोड़ि, तुझै लव लाइया ।
 सुमिरि तिहारो नाम, परम पद पाइया ॥ ३ ॥
 जिन यह लाहा पायो, यह जग आय कै ।
 उतरि गयो भवपार, तेरो गुन गाइ कै ॥ ४ ॥
 तुही मातु, तुही पिता, तुही हित-बन्धु है ।
 कहत मद्धका दास, बिना तुझ धुंध है ॥ ५ ॥

(१६७)

कौन मिलावै जोगिया हो,
 जोगिया बिन रह्यो न जाय ॥टेका॥
 मैं जो प्यासी पीवकी,
 रटत फिरौं पिउ पीव ।

जो जोगिया नहिं मिलिहै हो,
तो तुरत निकासूँ जीव ॥ १ ॥

गुरुजी अहेरी मैं हिरनी,
गुरु मारै प्रेमका बान ।

जेहि लागै सोई जानई हो,
और दरद नहिं जान ॥ २ ॥

कहैं मल्लूक सुनु जोगिनी रे,
तनहिंमें मनहिं समाय ।

तेरे प्रेमके कारने जोगी,
सहज मिला मोहिं आय ॥ ३ ॥

(१६८)

तेरा मैं दीदार-दिवाना ।

घड़ी घड़ी तुझे देखा चाहूँ,
सुन साहेब रहमाना ॥ १ ॥

हुआ अलमस्त खबर नहिं तनकी,
 पीया प्रेम-पिआला ।
 ठाढ़ होउँ तौ गिरि गिरि परता,
 तेरे रँग मतवाला ॥ २ ॥
 खड़ा रहूँ दरबार तुम्हारे,
 ज्यों घरका बंदाजादा ।
 नेकीकी कुलाह सिर दीये,
 गले पैरहन साजा ॥ ३ ॥
 तौजी और निमाज न जानूँ,
 ना जानूँ धरि रोजा ।
 बाँग जिकर तबहीसे बिसरी,
 जबसे यह दिल खोजा ॥ ४ ॥
 कह मलुक अब कजा न करिहौँ,
 दिलहीसो दिल लाया ।
 मक्का हज हियेमें देखा,
 पूरा मुरसिद - पाया ॥ ५ ॥

(१६९)

दरद-दिवाने बावरे, अलमस्त फकीरा ।
 एक अकीदा लै रहे, ऐसे मन-धीरा ॥ १ ॥
 प्रेमी पियाला पीवते, बिसरे सब साथी ।
 आठ पहर यों झूमते, ज्यों माता हाथी ॥ २ ॥
 उनकी नजर न आवते, कोई राजा रंक ।
 बंधन तोड़े मोहके, फिरते निहसंक ॥ ३ ॥
 साहेब मिल साहेब भये, कछु रही न तमाई ।
 कहैं मल्लूक तिस घर गये, जहँ पवन न जाई ॥ ४ ॥

(१७०)

हमसे जनि लागै तू माया ।
 थोरेसे फिर बहुत होयगी,
 सुनि पैहैं रघुराया ॥ १ ॥
 अपनेमें है साहेब हमारा,
 अजहूँ चेतु दिवानी ।
 काहू जनके बस परि जैहौ,
 भरत मरहुगी पानी ॥ २ ॥

तर है चितै लाज करु जनकी,
 डारु हाथकी फाँसी ।
 जनते तेरो जोर न लहिहै,
 रञ्छपाल अबिनासी ॥ ३ ॥
 कहै मल्लका चुप करु ठगनी,
 औगुन राखु दुराई ।
 जो जन उबरै राम नाम कहि,
 तारै कछु न बसाई ॥ ४ ॥

(१७१)

नाम हमारा खाक है, हम खाकी बन्दे ।
 खाकहीं ते पैदा किये, अति गाफ़िल गन्दे ॥ १ ॥
 कबहुँ न करते बंदगी, दुनियामें भूले ।
 आसमानको ताकते, घोड़े चढ़ि फूले ॥ २ ॥
 जोरु-लड़के खुस किये, साहेब बिसराया ।
 राह नेकीकी छोड़िके, बुरा अमल कमाया ॥ ३ ॥
 हरदम तिसको याद कर, जिन वजूद सँवारा ।
 सबै खाक दर खाक है, कुछ समुझ गँवारा ॥ ४ ॥

हाथी घोड़े खाकके, खाक खानखानी ।
कहैं मल्लक रहि जायगा, औसाफ निसानी ॥ ५ ॥

(१७२)

ऐ अजीज ईमान तू, काहेको खोवै ।
हिय राखै दरगाहमें, तो प्यारा होवै ॥ १ ॥
यह दुनिया नाचीजके, जो आसिक होवै ।
भूलै जात खोदायको, सिर धुन धुन रोवै ॥ २ ॥
इस दुनिया नाचीजके, तालिब हैं कुत्ते ।
लज्जतमें मोहित हुए, दुख सहे बहूते ॥ ३ ॥
जबलगि अपने आपको, तहकीक न जानै ।
दास मल्लका रबको, क्योंकर पहिचानै ॥ ४ ॥

(१७३)

गरब न कीजै बावरे, हरि गरब प्रहारी ।
गरबहितें रावन गया, पाया दुख भारी ॥ १ ॥
जरन खुदी रघुनाथके, मन नाहिं सुहाती ।
जाके जिय अभिमान है, ताकी तोरत छाती ॥ २ ॥

एक दया और दीनता, ले रहिये भाई ।
 चरन गहौ जाय साधके, रीझै रघुराई ॥ ३ ॥
 यही बड़ा उपदेस है, परद्रोह न करिये ।
 कह मन्त्रक हरि सुमिरिके, भौसागर तरिये ॥ ४ ॥

(१७४)

ना वह रीझै जप-तप कीन्हे, ना आतमको जारे ।
 ना वह रीझै धोती टाँगे, ना कायाके पखारे ॥
 दाया करै धरम मन राखै, घरमें रहै उदासी ।
 अपना-सा दुख सबका जानै, ताहि मिलै अविनासी ॥
 सहै कुसब्द बादहूँ त्यागै, छाँड़ै गरब गुमाना ।
 यही रीझ मेरे निरंकारकी, कहत मन्त्रक दिवाना ॥

(१७५)

राम कहो राम कहो, राम कहो बावरे ।
 अवसर न चूक भोंदू, पायो भलो दाँव रे ॥ १ ॥
 जिन तोकों तन दीन्हों, ताकौ न भजन कीन्हो ।
 जनम सिरानो जात, लोहे कैसो ताव रे ॥ २ ॥

रामजीको गाय गाय, रामजीको रिझाव रे ।
 रामजीके चरन-कमल, चित्तमाहिं टाव रे ॥ ३ ॥
 कहत मल्लकदास, छोड़ दे तैं झूठी आस ।
 आनँद मगन होइके, हरिगुन गाव रे ॥ ४ ॥

(१७६)

दीनबन्धु दीनानाथ मेरी तन हेरिये ॥ टेक ॥
 भाई नाहिं, बन्धु नाहिं, कुटुम-परिवार नाहिं,
 ऐसा कोई मित्र नाहिं, जाके टिँग जाइये ॥ १ ॥
 सोनेकी सलैया नाहिं, रूपेकां रुपैया नाहिं,
 कौड़ी-पैसा गाँठ नाहिं, जासे कल्लु लीजिये ॥ २ ॥
 खेती नाहिं, बारी नाहिं, बनिज-व्यौपार नाहिं,
 ऐसा कोई साहु नाहिं, जासों कल्लु माँगिये ॥ ३ ॥
 कहत मल्लकदास, छोड़ि दे पराई आस,
 रामवनी पाइकै अब्र काकी सरन जाइये ॥ ४ ॥



चरनदास

(१७७) सीठना

सुन सुरत रँगीली हो कि हरि-सा यार करौ ॥टेक॥
 जब छूटै बिघन बिकार कि भौ-जल तुरत तरौ ॥१॥
 तुम त्रैगुन छैल बिसारि गगनमें ध्यान धरौ ॥२॥
 रस अमरित पीत्रो हो कि बिषया सकल हरौ ॥३॥
 करि सील-संतोष सिँगार छिमाकी माँग भरौ ॥४॥
 अब पाँचों तजि लगवार अमर घर पुरुष बरौ ॥५॥
 कहै चरनदास गुरु देखि पियाके पाँव परौ ॥६॥

(१७८)

टुक रंगमहलमें आव कि निरगुन सेज बिछी ।
 जहँ पवन-गवन नहिं होय जहाँ जा सुरति बसी ॥१॥
 जहँ त्रैगुन बिन निरवान जहाँ नहिं सूर-ससी ।
 जहँ हिल-मिलकै सुख मान मुक्तिकी होय हँसी ॥२॥
 जहँ पिय-प्यारी मिलि एक कि आसा दुई नसी ।
 जहँ चरनदास गलतान कि सोभा अधिक लसी ॥३॥

(१७९)

टुक निरगुन छैल सूँ, कि नेह लगाव री ।
 जाकौ अजर अमर है देस, महल बेगमपुर री ॥१॥
 जहँ सदा सुहागिन होय, पियासूँ मिलि रहू री ।
 जहँ आवागवन न होय, मुकति चेरी तेरी ॥२॥
 कहँ चरनदास गुरु मिले, सोई हौँ रहू बौरी ।
 तब सुखसागरके बीच, कलहरी है रहू री ॥३॥

(१८०) हिँडोला हेली

तरसै मेरे नैन हेली, राम-मिलन कब होयगो ॥टेक॥
 पियदरसन बिन क्यों जिऊँ री हेली, कैसे पाऊँ चैन ।
 तीर्थ बर्त बहुतै किये री, चित दै सुने पुरान ॥१॥
 बाट निहारत ही रहुँ री हेली, सुधि नहिं लीनी आय ।
 यह जोबन योंही चलौ री, चालौ जनम सिराय ॥२॥
 बिरहा दल साजे रहै री हेली, छिन छिनमें दुख देहि ।
 मन लालनके बस परौ, भई भाक-सी देहि ॥३॥

गुरु सुकदेव कृपा करौ जी हेली, दीजै बिरह छुटाय ।
चरनदास पियसूँ मिलै सरन तुम्हारी धाय ॥४॥

(१८१)

मो बिरहिनकी बात हेली, बिरहिन होइ जानिहै ।
नैन बिछोहा जानती री हेली, बिरहै कीन्हों घात ॥
॥ टेक ॥

या तनकूँ बिरहा लगे री हेली, ज्यों धुन लागो काठ ।
निसदिन ग्वाये जातु है, देखूँ हरिकी बाट ॥ १ ॥
हिरदेमें पात्रक जरै री हेली, तपि नैना भये लाल ।
आसूँपर आसूँ गिरै, यही हमारो हाठ ॥ २ ॥
प्रीतम बिन कल ना परै री हेली, कलकल सब
अकुल्यहिं ।

डिगी पसूँ, सत ना रहौ, कत्र पिय पकरै बाँहिं ॥३॥
गुरु सुकदेव दया करै री हेली, मोहि मिलावै लाल ।
चरनदास दुख सब भजै, सदा रहूँपति नाल ॥४॥

(१८२) होली

प्रेमनगरके माहिं होरी होय रही ।

जब सों खेली हमहूँ चित दै,

आपनहूँको खोय रही ॥ १ ॥

बहुतन कुल अरु लाज गँवाई,

रहौ न कोई काम ।

नाचि उठैं, कभी गावन लागै,

भूले तन-धन-धाम ॥ २ ॥

बहुतनकी मति रंग रँगौ है,

जिनको लागौ प्रेम ।

बहुतनको अपनी सुधि नाहीं,

कौन करै अस नेम ॥ ३ ॥

बहुतनकी गद्गद ही बानी,

नैनन नीर दराय ।

बहुतनको बौरापन लागो,

हौंकी कही न जाय ॥ ४ ॥

प्रेमीकी गति प्रेमी जानै,
 जाके लागी होय ।
 चरनदास उस नेहनगरकी,
 सुकदेवा कहि सोय ॥ ५ ॥

(१८३) मंगल

समझ रस कोइक पावै हो ।
 गुरु बिन तपन बुझै नहीं, प्यासा नर जावै हो ॥१॥
 बहुत मनुष ढूँढ़त फिरैं, अंधरे गुरु सेवैं हो ।
 उनहुँकों सूझै नहीं, औरनकों देवैं हो ॥२॥
 अँधरेकों अँधरा मिलै, नारीकों नारी हो ।
 हौं फल कैसे होयगा, समझैं न अनारी हो ॥३॥
 गुरु सिष दोउ एक से, एकै व्यवहारा हो ।
 गये भरोसे डूबिकै वै, नरक मँझारा हो ॥४॥
 सुकदेव कहैं चरनदाससूँ, इनका मत कूरा हो ।
 ग्यान मुक्ति जब पाइये, मिलै सतगुरु पूरा हो ॥५॥

(१८४) सोरठ

वह पुरुषोत्तम मेरा यार ।

नेह लगी टूटै नहिं तार ॥ १ ॥

तीरथ जाउँ न बर्त करूँ ।

चरनकमलको ध्यान धरूँ ॥ २ ॥

प्रानपियारे मेरेहिं पास ।

बन बन माहिं न फिरूँ उदास ॥ ३ ॥

पढ़ूँ न गीता-बेद-पुरान ।

एकहिं सुमिरूँ श्रीभगवान ॥ ४ ॥

औरनकों नहिं नाउँ सीस ।

हरि ही हरि हैं बिस्वे बीस ॥ ५ ॥

काहूकी नहिं राखूँ आस ।

तृन्ना काटि दर्ई है फाँस ॥ ६ ॥

उद्यम करूँ, न राखूँ दाम ।

सहजहिं है रहै पूरन काम ॥ ७ ॥

सिद्धि मुकति फल चाहौं नाहिं ।

नित ही रहूँ हरि संतन माहिं ॥ ८ ॥

गुरु सुकदेव यही मोहिं दीन ।

चरनदास आनँद लवलीन ॥ ९ ॥

(१८५) हिंडोला

झूट कोइ कोइ संत लगन हिंडोलने ॥ टेक ॥

पौन उमाह उछाह धरती सोच सावन मास ।

लाजके जहँ उड़त बगुले मोर हैं जग हाँस ॥१॥

हरष-सोक दोउ खंभ रोपे सुरत डोरी लाय ।

बिरहपटरी बैठि सजनी उमँग आवै जाय ॥२॥

सकल बिकल तहँ देत झोके बिपत गावनहार ।

सखी बहुतक रंग राती रँगी पाँचौं नार ॥३॥

नैन बादल उमँगि बरसैँ दामिनी दमकात ।

बुद्धिकौ ठहराय नाहीं, नेहकी नहिं जात ॥४॥

सुकदेव कहैँ, कोइ बली झूलें, सीस देत अकोर ।

चरनदासा भये बौरे जाति-बरन-कुल छोर ॥५॥

(१८६) बिहाग

साधो निंदक मित्र हमारा ।
 निंदककों निकटे ही राखों, होन न देऊँ नियारा ॥१॥
 पाछे निंदा करि अघ धोवै, सुनि मन मिटै बिकारा ।
 जैसे सोना तापि अगिनमें, निरमल करै सोनारा ॥२॥
 घन अहरन कसि हीरा निबटै, कीमत लच्छ हजार ।
 ऐसे जाँचत दुष्ट संतकूँ करन जगत उजियारा ॥३॥
 जोग-जग्य जप पाप कटन हितु, करै सकळ संसारा ।
 बिन करनी मम करम कठिन सब, मेटै निंदक प्यारा ४
 सुखी रहो निंदक जग मौँहीं, रोग न हो तन सारा ।
 हमरी निंदा करनेवाला, उतरै भवनिधि पारा ॥५॥
 निंदकके चरनोंकी अस्तुति, भाखौँ बारंबारा ।
 चरनदास कहँ सुनियो साधो, निंदक साधक भारा ६

(१८७) परज

जिन्हँ हरिभगति पियारी हो !
 मात-पिता सहजै छुटै, छुटै सुत अरु नारी हो ॥१॥

लोकभोग फीके लगै, सम अस्तुति गारी हो ।
 हानि-लाभ नहिं चाहिये, सब आसा हारी हो ॥२॥
 जगसूँ मुख मोरे रहै, करै ध्यान मुरारी हो ।
 जित मनुवाँ लागो रहै, भइ घट उँजियारी हो ॥३॥
 गुरु सुकदेव बताइया, प्रेमी गति भारी हो ।
 चरनदास चारौं बेदसूँ, औरै कछु न्यारी हो ॥४॥

(१८८)

गुरु हमरे प्रेम पियायौ हो ।
 ता दिन तें पलटौ भयौ, कुल गोत नसायौ हो ॥१॥
 अलम चढ़ौ गगनै लगौ, अनहद मन छायाँ हो ।
 तेजपुंजकी सेजपै, प्रीतम गल लायौ हो ॥२॥
 गये दिवाने देसड़े, आनँद दरसायौ हो ।
 सब किरिया सहजै छुटी, तप नेम भुलायौ हो ॥३॥
 त्रैगुनतें ऊपर रहूँ, सुकदेव बसायौ हो ।
 चरनदास दिन रैन, नहिं तुरिया-पद पायौ हो ॥४॥

(१८९) सोरठ

अब घर पाया हो मोहन प्यारा ॥ टेक ॥

लखो अचानक अज अबिनासी,

उघरि गये टग तारा ॥ १ ॥

झूमि रह्यौ मेरे आँगनमें,

टरत नहीं कहुँ टारा ॥ २ ॥

रोम रोम हिय माहीं देखो,

होत नहीं छिन न्यारा ॥ ३ ॥

भयो अचरज चरनदास न पैये,

खोज किये बहु बारा ॥ ४ ॥

(१९०) काफी

कोइ दिन जीवै तौ कर गुजरान ।

कहर गखरी छौंड़ि दिवाने,

तजौ अकसकी बान ॥ १ ॥

चुगली-चोरी अरु निंदा लै,

झूठ कपट अरु कान ।

इनकुँ डारि गहै जत सत कुँ,

सोई अधिक सयान ॥ २ ॥

हरि हरि सुमिरौ, छिन नहिं बिसरौ,

गुरुसेवा मन ठानि ।

साधुनकी संगति कर निस-दिन,

आवै ना कछु हानि ॥ ३ ॥

मुड़ौ कुमारग, चलौ सुमारग,

पावौ निज पुर बास ।

गुरु सुकदेव चेटावै तोकुँ,

समुझ चरन हीं दास ॥ ४ ॥



गुरु नानक

(१९१)

राम सुमिर, राम सुमिर, एही तेरो काज है ॥टेका॥
 मायाकौ संग त्याग, हरिजूकी सरन लग ।
 जगत सुख मान मिथ्या, झूठौ सब साज है ॥ १ ॥
 सुपने ज्यों धन पिछान, काहेपर करत मान ।
 बारूकी भीत तैसें, बसुधाकौ राज है ॥ २ ॥
 नानक जन कहत बात, बिनसि जैहै तेरो गात ।
 छिन छिन करि गयो काल्ह, तैसे जात आज है ॥ ३ ॥

(१९२)

सब कछु जीवतकौ व्यौहार ।
 मात-पिता, भाई-सुत, बांधव,
 अरु पुनि गृहकी नारि ॥ १ ॥
 तनतें प्रान होत जब न्यारे,
 टेरत प्रेत पुकार ।

आध घरी कोऊ नहिं राखै,
 घरतें देत निकार ॥ २ ॥
 मृग-तृष्णा ज्यों जग रचना यह,
 देखौ हृदै बिचार ।
 कह नानक, भजु रामनाम नित,
 जातें होत उधार ॥ ३ ॥

(१९३)

हौं कुरबाने जाउँ पियारे, हौं कुरबाने जाउँ ॥टेका॥
 हौं कुरबाने जाउँ तिन्हौं दे, लैन जो तेरा नाउँ ।
 लैन जो तेरा नाउँ तिन्हौं दे, हौं सद कुरबाने जाउँ । १।
 काया रँगन जे थिये प्यारे, पाइये नाउँ मजीठ ।
 रंगनवाला जे रँगो साहिब, ऐसा रंग न डीठ ॥२॥
 जिंनके चोलड़े रत्तड़े प्यारे, कंत तिन्हौं दे पास ।
 धूड़ तिन्हौं को जे मिले जीको, नानकदी अरदास । ३।

(१९४)

मुरसिद मेरा मरहमी, जिन मरम बताया ।

दिल अंदर दीदार है, खोजा तिन पाया ॥ १ ॥
 तसबी एक अजूब है, जामें हरदम दाना ।
 कुंज किनारे बैठिके, फेरा तिन्ह जाना ॥ २ ॥
 क्या बकरी, क्या गाय है, क्या अपनो जाया ।
 सबकौ लोहू एक है, साहिब फरमाया ॥ ३ ॥
 पीर पैगम्बर औलिया, सब मरने आया ।
 नाहक जीव न मारिये, पोषनको काया ॥ ४ ॥
 हिरिस हिये हैवान है, बसि करिलै भाई ।
 दाद इलाही नानका, जिसे देवै खुदाई ॥ ५ ॥

(१९५)

काहे रे बन खोजन जाई ।
 सब निवासी सदा अलेपा,
 तोही संग समाई ॥ १ ॥
 पुष्प मध्य ज्यों बास बसत है,
 मुकर माहिं जस छाई ।

तैसे ही हरि बसै निरंतर,
 घट ही खोजौ भाई ॥२॥
 बाहर भीतर एकै जानों,
 यह गुरु ग्यान बताई ।
 जन नानक विन आपा चीन्हे,
 मिटै न भ्रमकी काई ॥ ३ ॥

(१९६)

प्रभु मेरे प्रीतम प्रान पियारे ।
 प्रेम-भगति निज नाम दीजिये,
 दाल अनुग्रह धारे ॥ १ ॥
 सुमिरौं चरन तिहारे प्रीतम,
 हृदैं तिहारी आसा ।
 संत जनोंपै करौं बेनती,
 मन दरसनकौ प्यासा ॥ २ ॥
 बिछुरत मरन, जीवन हरि मिञ्छते,
 जनको दरसन दीजै ।

नाम अधार, जीवन, धन नानक,

प्रभु मेरे किरपा कीजै ॥ ३ ॥

(१९७)

अब मैं कौन उपाय करूँ ।

जेहि बिधि मनको संसय छूटै,

भव-निधि पार पकूँ ॥ १ ॥

जनम पाय कछु भलौ न कीन्हों,

तातें अधिक डरूँ ॥ २ ॥

गुरुमत सुन कछु ग्यान न उपज्यौ,

पसुवत उदर भरूँ ॥ ३ ॥

कह नानक, प्रभु बिरद पिछानौ,

तब हौं पतित तरूँ ॥ ४ ॥

(१९८)

या जग मीत न देख्यो कोई ।

सकल जगत अपने सुख लाग्यो,

दुखमें संग न होई ॥ १ ॥

दारा-मीत,

पूत-संबंधी,

सगरे धनसों लागे ।
 जबहीं निरधन देख्यो नरकों,
 संग छाड़ि सब भागे ॥ २ ॥
 कहा कहूँ या मन बौरेकों,
 इनसों नेह लगाया ।
 दीनानाथ सकल भय-भजन,
 जस ताको बिसराया ॥ ३ ॥
 स्वान-पूँछ ज्यों भयो न सूयो,
 बहुत जतन में कीन्हौ ।
 नानक लाज बिरदकी राखौ
 नाम तिहारो लीन्हौ ॥ ४ ॥

(१११)

जो नर दुखमें दुख नहिं मानै ।
 सुख-सनेह अरु भय नहिं जाके,
 कंचन माटी जानै ॥ १ ॥
 नहिं निंदा, नहिं अस्तुति जाके,

लोभ-मोह-अभिमाना ।

हरष सोकर्ते रहै नियारो,
 नाहिं मान-अपमाना ॥ २ ॥
 आसा-मनसा सकल त्यागिकै,
 जगते रहै निरासा ।
 काम-क्रोध जेहि परसै नाहिन,
 तेहिं घट ब्रह्म निवासा ॥ ३ ॥
 गुरु किरपा जेहिं नरपै कीन्ही,
 तिन यह जुगति पिछानी ।
 नानक लीन भयो गोविंदसों,
 ज्यों पानी सँग पानी ॥ ४ ॥

(-२००)

यह मन नेक न कह्यौ करै ।
 सीख सिखाय रह्यो अपना-सी,
 दुरमतिते न टरै ॥ १ ॥
 मद-माया-बस भयौ बावरौ,

हरिजस नहिं उचरै ।
 करि परपंच जगतके डहकै,
 अपनौ उदर भरै ॥ २ ॥
 स्वान-पूँछ ज्यों होय न सूधौ,
 कह्यौ न कान धरै ।
 कह नानक, भजु रामनाम नित,
 जातें काज सरै ॥ ३ ॥

(३०१)

जगतमें झूठी देखी प्रीत ।
 अपने ही सुखसों सब लागे, क्या दारा, क्या मीत ॥
 मेरौ मेरौ सभी कहत हैं, हितसों बाँध्यौ चीत ।
 अंतकाल संगी नहिं कोऊ, यह अचरजकी रीत ॥
 मन मूरख अजहूँ नहिं समुझत, सिख दै हार्यौ नीत ।
 नानक भव-जल-घार परै जो गावै प्रभुके गीत ॥



दरिया साहब

(२०२)

जाके उर उपजी नहिं भाई ।

सो क्या जानै पीर पराई ॥ टेका ॥

ब्यावर जानै पीरकी सार ।

बाँझ नार क्या लखै बिकार ॥ १ ॥

पतिव्रता पतिकौ ब्रत जानै ।

बिभचारिन मिल कहा बखानै ॥ २ ॥

हीरा-पारख जौहरी पावै ।

मूरख निरखकै कहा बतावै ॥ ३ ॥

लागा घाव कराहै सोई ।

कोगतहार के दरद न कोई ॥ ४ ॥

रामनाम मेरा प्रान-अधार ।

सोई रामरस पावनहार ॥ ५ ॥

जन दरिया जानैगा सोई ।

(जाके) प्रेमकी भाल कलेजे पोई ॥ ६ ॥

(२०३)

जो धुनियाँ तौ भी मैं राम तुम्हारा ।
 अधम कमीन जाति मतिहीना,
 तुम तौ हौ सिरताज हमारा ॥टेका॥
 कायाका जंत्र सबद मन मुठिया,
 सुषमन ताँत चढ़ाई ।
 गगनमँडलमें धुनुआँ बैठा,
 मेरे सतगुर कला सिखाई ॥ १ ॥
 पाप पान हर कुबुध काँकड़ा,
 सहज सहज झड़ जाई ।
 घुंडी-गाँठ रहन नहिं पावै,
 इकरंगी होय आई ॥ २ ॥
 इकरँग हुआ भरा हरि चोला,
 हरि कहै कहा दिलाऊँ ।
 मैं नाहीं मेहनतका लोभी,
 बकसौ मौज भगति निज पाऊँ ॥ ३ ॥

किरपा कर हरि बोले बानी,
 तुम तौ हौं मम दास ।
 दरिया कहै, मेरे आतम भीतर,
 मेलौ राम भगति बिस्वास ॥ ४ ॥

(२०४)

बाबल कैसे बिसरो जाई ।
 जदि मैं पति सँग रल खेलूँगी, आपा धरम समाई । टेका ।
 सतगुरु मेरे किरपा कीनी, उत्तम बर परणार्ई ।
 अब मेरे साईको सरम पडैगी, लेगा हृदई लगाई ॥
 थे जानराय, मैं बाली-भोली, थे निरमल, मैं मैली ।
 थे बतलाओ, मैं बोल न जानूँ, भेद न सकूँ सहेली ॥
 थे ब्रह्मभाव, मैं आतम कन्या, समझ न जानूँ बानी ।
 दरिया कहै, पति पूरा पाया, यह निश्चै कर जानी ॥

(२०५) भैरव

कहा कहुँ मेरे पिउकी बात ।
 जो रे कहुँ सोइ अंग सुहात ॥ टेका ॥

जब मैं रही थी कन्या कर्त्री ।

तब मेरे करम हता सिर भारी ॥ १ ॥

जब मेरी पिउसे मनसा दौड़ी ।

सतगुरु आन सगाई जोड़ी ॥ २ ॥

जब मैं पिउका मंगल गाया ।

तब मेरा स्वामी व्याहन आया ॥ ३ ॥

हथलेवा कर बैठी संगी ।

तब मोहिं लीनी बाँये अंगी ॥ ४ ॥

तन दरिया कहै मिट गई दूती ।

आपौ अरप पीवसँग सूती ॥ ५ ॥

(२०६)

रामनाम नहिं हिरदे धरा ।

जैसा पसुवा तैसा नरा ॥ १ ॥

पसुवा-नर उद्यम कर खारै ।

पसुवा तौ जंगल चर आवै ॥ २ ॥

पसुत्रा आवै, पसुत्रा जाय ।

पसुत्रा चरै औ पसुत्रा खाय ॥ ३ ॥

रामनाम ध्याया नहिं माई ।

जनम गया पसुत्राकी नाई ॥ ४ ॥

रामनामसे नाहीं प्रीत ।

यह ही सब पसुत्रोंकी रीत ॥ ५ ॥

जीवत सुखदुखमें दिन भरै ।

मुत्रा पछे चौरासी परै ॥ ६ ॥

जन दरिया जिन राम न ध्याया ।

पसुत्रा ही ज्यों जनम गँवाया ॥ ७ ॥





श्रीहरिः

श्रीजयदयालजी गोयन्दकाद्वारा लिखित-

तत्त्व-चिन्तामणि भाग १ (सचित्र)

प्रस्तुत पुस्तकमें 'कल्याण' में प्रकाशित निबन्धोंका संग्रह है। पृष्ठ ३५०, मूल्य ॥=) सजिल्द ... ॥।-)

तत्त्व-चिन्तामणि भाग १ (सचित्र)

(छोटे आकारका गुटका संस्करण)

साइज २२X२९, ३२ पेजी, पृष्ठ ४८८, ।-), ।=)

तत्त्व-चिन्तामणि भाग २ (सचित्र)

इसमें 'कल्याण' के ४८ निबन्धोंका संग्रह है, पृष्ठ ६३२, मूल्य ॥।=), सजिल्द १=)

तत्त्व-चिन्तामणि भाग २ (सचित्र)

(छोटे आकारका गुटका संस्करण)

साइज २२X२९, ३२ पेजी, पृष्ठ ७५०, मू० ।=), ॥)

तत्त्व-चिन्तामणि भाग ३ (सचित्र)

प्रथम और द्वितीय भागोंको देखनेसे इसकी उपयोगिता समझ जायेंगे। पृष्ठ ४५०, मू० ॥=), ॥।=)

तत्त्व-चिन्तामणि भाग ३ (सचित्र)

(छोटे आकारका गुटका संस्करण)

साइज २२X२९, ३२ पेजी, पृष्ठ ५६०, मू० ।-), ।=)

पता-गीताप्रेस, गोरखपुर।

सस्ता साहित्य

छोटी—पर उपयोगी पुस्तकें

नारीधर्म	-)॥	प्रश्नोत्तरी (सार्थ))॥
श्रीसीताके चरित्रसे आदर्श		सेवाके मन्त्र)॥
शिक्षा	-)।	सीतारामभजन)॥
मूलरामायण, सार्थ, सचित्र-)।	भगवान् क्या है ?)॥
गोसाईं-चरित (मूल)	-)।	भगवत्प्राप्तिके विविध उपाय)॥
ईश्वर (ले० श्रीमालवीयजी)	-)।	महात्मा किसे कहते हैं ?)।
मनको वश करनेके उपाय	-)।	प्रेमका सच्चा स्वरूप)।
गीताका सूक्ष्म विषय	-)।	धर्म क्या है ?)।
सप्त-महाव्रत(ले० श्रीगांधीजी)-)।	त्यागसे भगवत्प्राप्ति)।
आचार्यके सदुपदेश	-)।	हमारा कर्तव्य)।
एक संतका अनुभव	-)।	ईश्वर दयालु और न्याय-)।
समाज-सुधार	-)।	कारी है ...)।
ब्रह्मचर्य	-)।	दिव्य सन्देश)।
प्रेम-भक्ति-प्रकाश, सचित्र	-)।	नारद-भक्ति-सूत्र (सार्थ))।
सच्चा सुख और उसकी		पातञ्जलयोगदर्शन (मूल))।
प्राप्तिके उपाय	-)।	कल्याणभावना)।
शारीरकमीमांसादर्शन)॥	चेतावनी)।
हरेरामभजन (दो माला))॥	गीता दूसरा अध्याय)।
विष्णुसहस्रनाम)॥ स०	-)॥	सप्तश्लोकी गीता आधा पैसा	
रामगीता (सार्थ))॥	गजल गीता	”
सन्ध्या विधिसहित)॥	लोभमें ही पाप है	”

पता—गीताप्रेस, गोरखपुर ।

